



經上集八

^ 16
2414
8



和
2414
11-8

經山集卷十五目錄



神道碑

左議政敬獻金公

思穆

神道碑

左議政文貞朴公

宗薰

神道碑

判敦寧府事兼吏曹判書洪公

敬謨

神道碑

工曹判書洪公

學淵

神道碑

弘文館修撰贈吏曹判書金公

義貞

神道碑

知中樞府事兼吏曹判書李公

若愚

神道碑

左議政朴公

晦壽

神道碑

經山集卷十五

東萊鄭元容善之

神道碑

左議政敬獻金公

思穆

神道碑

純宗大王御極之八年治化熙隆百揆時敘思得左
 右輔弼之賢贊理庶政乃擢拜金公思穆為相職
 上喜曰予得相矣特諭卿 聖后家人 三朝舊臣
 忠慎謹慤績用茂著卿其為我股肱為國楨榦公辭
 不出 上遣正卿起公公黽勉起以奮聖志勤講學
 惜名器為誠明年公以年至引經告退 上曰今國



勢豈可捨卿公感激隆毗身不自有殫竭忠慮遇事
獻替嘗憫嘆奏曰願 聖上一言一動常如上帝監
臨仍請省冗濫以備賑資揀才能以章吏治其於廣
言路疏冤獄尤惓惓焉越三年辛未 上違豫暑月
多勞動公時帶藥院每乘輿出奉湯劑步從雖汗喘
跽仆不恤也有間輒陳攝養之說懇懇由衷悃涕隨
言下 上感動多勉從後十年辛巳 孝懿王后喪
將遷奉 健陵以 后附玄宮出相臣當進時恠診
熾邁者無宰相臣俱告病公方臥床趣駕行家人憂
止之公叱之曰若輩何知吾受 先王恩常願一死

死不顧也後已丑十一月十七日公年九十卒于正
寢 上震悼侔官諭祭命有司庇喪事教曰此大臣
祥和端慤貌如其心壽考福履世罕其匹也况辛未
藥院盡瘁之誠辛巳 山陵力疾之行非人人可及
常所感歎而不能忘者賜東園副器飭賙賻 王世
子令曰以 三朝耆舊又經小子師傅皓髮登筵忠
愛溢於色辭今不勝愴廓遣宮官吊祭夫人墓在龍
仁巢雲里負子之原至是啓其右而合封焉公字伯
深慶州人新羅敬順王之後左議政慶林府院君忠
翼公諱命元公七世祖也生諱守廉僉知中樞府事

贈領議政鼇原君生諱南重禮曹判書慶川君贈左贊成諡貞孝生諱一振成均生員贈領議政公高祖也曾祖諱柱臣 肅廟國舅領敦寧府事慶恩府院君贈領議政諡孝簡祖諱後衍刑曹叅議贈左贊成考諱孝大刑曹判書贈領議政諡孝貞妣贈貞敬夫人延日鄭氏牧使諱志翼女公以 英宗庚申十二月一日生配東萊鄭氏監役得淳女領議政太和五世孫端淑有閨則生 英宗辛酉前公二十七年卒育三女無嗣取仲弟府使思稭子永受爲後副正女適李容鎮副正吳慶元叅判李元默側出男永丑永

受于鼎集今叅判中集進士女適鄭基世今承旨李容鎮子游府使洛瀾府使漫女適洪秉準吳慶元子顯相牧使顯甲郡守女適縣監趙然天宋持壽李元默子教英校理教俊縣令女適韓用彬縣令尹日善公弱冠補殿郎不就屢歷蔭仕至金堤郡守壬辰擢文科事 英宗大王 上賜詩寵之唱名纔五日選爲弘文館副校理轉副應教侍講院輔德陞拜承政院同副承旨常處之邇密教曰謹慎可貴事 正宗大王甲辰 英廟御極之周甲也 上曰使 宗社萬世盤泰之安莫非 聖后攸賜慶恩家近無位二

品者實非仰體 先王意仍擢公爲兵曹叅判轉禮
戶曹教曰予待卿異乎人義休戚與共卿毋負予公
矢心圖報不避夷險所至皆有美稱歷黃海監司庚
戌擢拜刑曹判書兼備局有司堂上新遷 園寢於
水原移設邑特授公府使日以卿諳鍊畿甸民情耳
及幸行喜措置有方特除吏曹判書公力辭 上曰
家規固謹約矣後因銓擬失檢補全羅右水使前後
三拜京畿監司七拜摠戎使五拜吏曹判書居藩則
約已而便民莅營則守律而裕儲掌銓則抑競而振
淹俱以績聞故遇闕 上輒授之曰惟此人可前後

委任之盛豈公比也又出爲平安監司未久臺疏追
論居銓時事竄忠州尋宥拜都摠管不膺命補黃海
兵使時貢使道卒遂命公公曰往役也倍程竣還差
伴送使又拜畿藩堅不出移補廣州留守事 純宗
大王拜兵曹判書一夜九違召而不獲命行京察連
拜禮曹判書漢城府判尹判義禁府事進階輔國戊
辰拜右議政每登對所建白多直切明剴 上樂聞
而稱善焉辛未冬土賊據定州久未平堂疏請遣使
督戰公劄陳曰自古監軍之法非命將專制之意論
者黷之丙子 惠慶宮薨議服制公奏本生降一等

之制遂定行武倖有濫殺人者王府議償命公請施
次律內贍提調疏請收望遠延坪船漁稅以補供需
公奏曰取商利補御供非事體也薦銓望四人臺疏
詆其濫公曰可去矣吾入中書十年何嘗一日忘退
乎疏屢上蒙解已卯 世子加元服公以左議政
世子傳赴召禮行尋單遞辛巳兼訓練都監司饗院
軍器寺都提調壬午 嘉順宮喪以爲父後者爲其
母總之議獻焉從之乙酉公進士回榜孫鼎集又進
士 上頒樂以宴之臨殿賜几杖恩禮之隆世未有
也丁亥 王世子代聽公以進德修業爲勉 元孫

誕生百日入對鼎集以記注隨 世子令扶公入筵
臣榮之戊子陞領中樞府事兼軍資監都提調公歷
官衆而行治多非儀節訐謨之大者并不書公天姿
英敏身不踰中人而符彩燁如音韻如考金內行篤
倫事親有至性祖母尹夫人老非公不能安自小官
恪勤盡職及處廟堂專以舉廢墜守程憲爲務不喜
更張曰民之安於法久矣身都將相樸約自奉檢身
幽獨未嘗跛倚大耋時誦尙書不錯字典章故實舉
對如流聰明如少年見者咸稱爲異人公立朝滿七
十年逮覩王家六世閱歷世故鍊達品式黃髮赤烏

冠冕昭代屹然爲元老宗臣國人愛之如麟鳳朝野倚之如著龜雖休退居閒之時國有大論大疑每就而問之蓋自古國家積累熙洽而後繼體守成之主拊靈長之運享亨嘉之福時則有若魏偉宏博之彥懷寶蘊美彌綸廊廟庇祉喬壽瑞世光國以當氣數之盛若隆宋之文富其人閱代而豈易得哉公藉世德之緒際三朝之聖誠忠端愨上結殊知德望足以鎮俗才猷足以經邦而又壽考康裕歷試而久任則其勲業乃有以大見於世而傳之不朽如公實有關邦國之休運而後之論公者庶可以知其世矣公

常誦食無求飽居無求安之訓曰吾一生受用在此手書無求室三字揭扁而常日之噫公之沈識貞操齊得喪一寵辱終始一節身完名全者其亦持養之有所本哉叅判君將樹碑神道請銘元容於公薰德久不敢以不文辭銘曰

於赫忠翼厥有勲烈孝簡毓慶塗莘其闕餘庠鍾挺公特英達爲國寶器金章玉質際英正朝昭契密勿純宗曰篤先志是述匪夢匪卜予有良弼公拜稽首曰臣皓髮追先報今險夷非恤凡有忠慮臣敢不竭乃出視事如矩斯挈察隱疏寃致民寧謐勅

勵羣工補我遺闕由後論世廩廩隆邳誰其相之我
公在列若歲兩辛忘軀盡節中朝發歎孰如卿哲邦
國之思乃功王室功名難居有得有失惟公始終旣
貞且吉我銘公德惟誠惟一

左議政文貞朴公 宗薰神道碑

潘南之朴爲本朝顯閥自麗季文正公潘南先生諱
尙衷仍籍焉國初佐命元勳右議政平度公諱嘗文
正子也後有諱紹贈領議政諡文康生諱東善左叅
贊貞憲公生諱烜吏曹叅判錦洲君忠肅公生諱世
堂吏曹判書文節公號曰西溪子曰泰維持平號曰

白石曰泰輔應教以忠旌閭諡文烈號曰定齋白石
公子諱弼基郡守贈吏曹判書子諱師得贈議政府
左贊成早卒缺嗣取從父弟郡守師範子子之諱參
源郡守贈議政府領議政郡守公之考弼謨牧使卽
白石公之次子而出後文烈公文烈以文節公次子
過房於從父處士公諱世屋議政公配贈貞敬夫人
韓山李氏議政府左議政孝靖公思觀女也次子諱
宗薰卽文貞公也公家事本朝十餘世來以忠烈正
直德望勲業道學爲箕裘隱則詩書禮讓之澤被於
阡陌仕則鍾鼎旂常之銘焜赫於簡竹而丘園芟帛

之賁綽楔旌表之典又何其盛也世德之所積累者
有如此而又有文貞爲之後其所謂趙文子之繼成
子之文宣子之忠而興者乎公生而秀整峻潔才知
超倫髻鬣時課誦綱目二百行及長潛心究經稽同
異蹟微奧推之史氏徧及諸子撰定之錄貫穿融會
博記洽聞旁及禮樂律令財賦筭數星曆諸籍古今
典章制度沿革損益之支無所不詣其精以至訂校
鑑識之妙字畫揮染之高皆才與工俱到鏤琬琰匾
殿閣者多出公手 純宗有御製必屬公曰惟卿可
正之愛公書嘗臨筵命書篆楷各體藏大內爲文簡

精委宛有作者軌範詩詞警拔雅麗至尋常札翰亦
爲人所奇重好禮說彙編四禮纂要十卷擢第初入
內閣一登對已受知 聖上我 純宗堯舜也心竒
公修經藝達國體才猷足以幹事恂忱足以盡節遇
事則任有疑則問宣召晉接未嘗旬月曠他日百揆
之宅已兆於宣室之對 純宗之朝自唱甲至輔相
惟公一人耳公以宏博之識抱經濟之具感激知遇
行其所學以朝夕納誨引君當道爲已任初爲弘文
館正字進言曰 殿下學問夙詣而根基猶未立千
乘之奉逸豫我氣體萬機之繁撓奪我心志繼自今

有疑於無疑有味於無味先思孔顏樂處乃是唐虞
心法 上賜批曰爾言甚是可深繹爾隨處盡言
以效啓沃之責爲副校理又疏曰誠信接下虛懷受
人卽人主治已治人之符耳必致力本原之上下手
幽獨之地先自理欲義利分界處明辨而痛治則極
工所到中和可致 上優批答之後以相職奏曰大
本急務無過於睿德成就其本在 殿下身教物誨
之勤仍請廣選宮官又請慎擇守令以盡保民之政
又曰新作主第過於侈大宜從儉約掖屬放肆駭於
聽聞宜加裁抑 上以服膺答之甲午 上昇退

憲宗嗣位 大王大妃垂簾公以六條陳勉畧曰慎
起居曰勤講學曰嚴宮闈曰杜倖門曰察民隱曰節
財用又請儲牟糴以備荒政築堤堰以益農務禁稅
賦之防納者疏刑獄之滯留者又論漁箭鹽盆商舶
之屬宮房徵稅者著令禁斷京外民情大悅奉審北
陵還以北民饑荒奏蠲蕩舊糴穀萬六千斛論北兵
使會寧府使不法狀重罪之已巳咸興民戶二千燒
上遣公慰諭還言沿江築堤植木蔽風口可防來患
當費錢萬緡請劃公稅錢如其數因圖形便以上
上特許之前後四按藩司歲一周輒辭爲治簡而該

惠而明通事務練典式以儒術潤飾之所過民久愈
思公嘗曰使屬官守法民懷吏憚是刺史事也若變
革更張徒滋其弊耳在都憲請掖隸之與府隸爭鬪
者付法司嚴繩之在副學 惠慶宮謚字初以溫敬
議上公言溫字未盡美丙午既定而改 上命改議
易獻字在館閣 上爲 嘉順宮服總卒哭踰月
上詢除服之限公以喪服小記總小功虞卒哭則免
爲對曰俟卒哭始除可知 上從之在惠堂奏度支
以免稅還收結賦稅并屬地部爲請賦稅分屬自有
法不宜地部專管在戶判奏蕩牙山倉漕軍舊逋萬

餘兩在兵判別薦武將家子孫材器可用者四人在
吏判正言李相龍疏論科場淆雜請罪試官擬望之
銓官公疏引 上答曰白地敲撼者豈非懷不逞而
嘗試乎此國家搢紳治亂休戚之所關也卿若自沮
亂日斯生公終不出命補光州牧使旋授前職批諭
曰予豈私好於卿卿母負予苦心公始膺命丁亥
壬世子代理己丑以 上聖壽四十御極三十年
世子將進饌公爲進饌所堂上適病 世子數數召
而不得造 世子頻遣人問且賜詩寓思見之心及
入召見喜曰卿病差乎每對多所諮訪庚寅 世子

薨公以戶判敦匠時賊臣投凶疏疏中亦誣巖公公
屏居郊舍 上以禮使之意解戶判尋除判尹曰滌
其詬辱依舊嚮用者聖讒說也尊國體也鎮澆俗也
公盡不膺謫補慶州府尹翌年以執金吾召還教曰
卿之遭誣只認以一身之故思爲自靖乎方誣之始
固當嚴覈廓清陰翳而惟思鎮安豈足一毫爲累於
卿又移授大司馬連教曰卿進身然後予意明君綱
立公惶感受符甲午擢拜議政府右議政諭曰家貧
思賢妻國亂思良相苟欲得賢卿實其人卿以忠貞
之齋盡匪躬之操內外績庸無出卿右操行不苟而

夷險燥濕義在勿避持身恬簡而甘辛酸醎無適不
當今予之舉卿非欲爲榮耀於卿乃所以擔負於卿
也公上章辭 上以安石蒼生之望諭之又褒之以
文理密察聰明才智詔之以房杜文富不借異代及
相 憲宗公登筵懇辭 慈聖教曰國無大臣何以
爲國卿欲辭免更勿思見予此座公又以獨任辭
慈聖曰古豈無十年五六年獨相之時乎及病 上
賜參劑遣醫看護及卒教曰端雅之姿綜明之才不
但華國之文采而已 先朝之所簡拔寡人之所倚
重愴惜不已致祭加賻此公歷試及恩注之終始也

公字舜可號荳溪以 英宗癸巳十一月二十六日
生 憲宗辛丑八月初七日考終壽六十九戊午升
司馬壬戌擢庭試丙科甲子拜弘文館正字 奎章
閣待教校書館正字丙寅除副校理應教兼文臣宣
傳官禁衛營從事移議政府檢詳轉舍人丁卯以大
祝勞陞通政階拜承政院同副承旨後屢拜至都承
旨除敦寧府都正兵曹叅知兼成均館大司成壬申
設 世子宮春桂坊爲侍講院輔德癸酉 孝懿王
后寶齡周甲行賀禮以對舉承旨陞嘉善階拜兵曹
叅判都摠府副摠管同知中樞府經筵義禁府事甲

戌拜大司憲 正宗御製印役成加陞嘉義乙亥拜
弘文館副提學差備局有司堂上戊寅拜 奎章閣
直提學己卯拜漢城府左尹庚辰爲吏曹叅判兼藝
文館提學 世子右副賓客壬午除禮曹叅判兼弘
文館提學製 徽慶園丁字閣上樑文進資憲知中
樞府事兼都承旨遷刑曹判書漢城府判尹差貢市
堂上甲申拜吏曹判書知經筵乙酉爲工曹判書特
拜禮曹判書丙戌拜兵曹判書兼 奎章閣提學圈
文衡準七點丁亥移戶曹判書差尊號都監堂上進
正憲階戊子 世子代點特除判義禁爲崇政遷議

政府左叅贊冬 元孫冊封特除兼 世孫宮諭善
甲午枚卜爲右議政丁酉爲實錄摠裁官進左議政
戊戌遞付判中樞府事兩銓度支周流屢拜外任則
外補光州未赴畿甸湖南關西關北四道監司及慶
州謫補也提舉則承文院 宗廟署 景慕宮奉常
寺宣惠廳內醫院宗簿寺司譯院觀象監繕工監冰
庫典牲署內贍寺及相職後內醫院司譯院訓練都
監司饗院也奉命則咸關火災時慰諭御史也癸未
謝恩正使也甲申永興本宮位板櫝奉審也甲午請
謚請襲陳奏正使也丁酉 濬源殿影幘奉審及戊

戊影幘奉安也賞賚則錫馬者五賜奴婢田結任子
者一 內殿賜表裏者三多以製述及書寫勞也葬
楊州嘉佐原負亥兆遷厝某地禮葬守遺言不受賜
謚曰文貞配綾城具氏判官悌元女贈貞敬夫人后
配碧珍李氏景弼女封貞敬夫人一女適洪祐命今
承旨初以從祖弟宗有子爲后後有故貞敬夫人達
於朝取族子松壽爲嗣嗚呼公篤孝友己巳丁議政
公憂庚辰丁母夫人憂生而養沒而慕皆由至性愛
伯氏未嘗一日離及喪兄弟所執御之物并收藏之
見必泫然推而睦宗黨恤孤惇常居端凝無惰容進

止有常不失尺寸與人少欵曲然朋儕盃樽之間談
圖史辨事物清標雅襟使人有倚玉樹襲芳馨之思
律身規矩之中燭理毫絲之微在禮言禮在兵言兵
財賦刑獄制治之具多畜前往援引曲當所行皆中
窾非倉卒應之者也三事以後慨然以裨主德庇民
生爲心宥密謨猷不無利澤之浸潤而惜乎猶未得
久於位而終厥成也然公以非常之才遇上聖之主
三十年明良契合恩禮兩至此豈以一事一藝可能
致之者武後之論世者必頌先王之明而幸公之
遭遇斯世也今去公纔一紀耳思公之宿德博識如

古人之邈然不可及者其於世級升降之際安得無
愴惜而累唏也哉元容公同年也自童時不以魯莽
而退棄也仕宦班聯奉餘光而周旋者跡相比也北
關陪真之行掌邦禮隨公後官晝驛宵吟咏談笑之
頃見公之憂國恤民之志屢形於言辭此又何可忘
也今元容老而獨存退去鄉廬林木蒼鬱雲烟浩渺
援筆而敘公之行蹟潸然欲涕能無九原可作之想
乎公嗣子請爲牲石之銘以今之識公之詳者莫吾若
也公豈待文而傳哉惟在法當銘也是不敢辭銘曰

維潘有閔赤舄綿聯邃學卓節如山如川公實繼挺

啓後多前所修者人所賦者天如器之珍斯隳斯甄
經之緯之史牒經箋苑其雲雷出之淵泉 純考圖
理俊又思延疇當 上意曰汝後先維黼維黻其瑚
其璉予欲聲明汝翼汝宣公起受之夢卜于賢 王
曰予職非寵之偏才則房杜文則許燕迺告嘉謨龍
象細氈道法率政百度罔愆暨相 憲廟握樞贊乾
慈聖曰忠勛先任專公亦匪躬殫慮佛肩著蔡柱石
令望赫焉一節靡渝玉縕金堅端亮貞固靖共肅虔
守約施博志方行圓維名之完維德之全維名維德
孰使其然 純考是思永垂於千

判敦寧府事兼吏曹判書洪公

敬謨

神道碑

我 正宗 純祖之世治教休明有若耳溪洪太史
起而大振厥聲以經術文章冠冕藝林中朝曉嵐紀
勻讀其文歎以爲當列宋明間家數有冢孫曰冠巖
諱敬謨自孩提於文敏悟殊凡日遊嬉耳溪公側濡
染而薰襲者無非經傳史籍議論制作皆有軌範所
謂長於匠石之園者也比長發其所畜雍容中度長
經幄而提兩館鉅篇短章輒爲世所稱所著有律曆
灾祥疆域官職等考志及耆社志南漢志論者謂能
世太史家者也公字敬修籍豐山以高麗直學諱之

慶爲上祖生諱侃都僉議舍人以直節聞生諱侑生
諱演兩世俱官大提學生諱龜中郎將當麗未隱居
入我朝五傳而有太司憲贈領議政諡文敬諱履祥
德行爲 宣廟名臣號慕堂生諱霽叅判贈上相號
秋巒生諱柱元永安尉尙貞明公主諡文懿號無何
堂生諱萬恢判決事生諱重聖郡守贈大冢宰號芸
窩有文集寔公高祖也會祖諱鎮輔早世贈左贊成
祖諱良浩判中樞府事兼吏曹判書兩館大提學諡
文獻卽耳溪公也有文集考諱樂源有文行嗇壽以
公貴贈左贊成娶坡平尹氏判書東哲女繼娶全州

李氏正言存遠女俱贈貞敬夫人公李出也以 英
宗甲午十一月十七日生 今 上辛亥正月二十四
日卒壽七十八葬于京畿楊州山宜里癸坐原配贈
貞敬夫人豐壤趙氏判書弘鎮女 英宗壬辰正月
二十七日生 純祖丁亥九月二十八日卒始葬天
安日峰山及是移祔公墓左一男二女男翼周縣監
女適承旨曹雲承叅議鄭翊朝翼周二男祐命今承
旨祐慶司果公生而秀穎髻鬣已好文才思日進
正宗時屢以童蒙侍筵講孝經製五言詩 上嘉之
賜書冊佩香又於文獻公耆社之對承命隨入賡進

御製乙卯 惠慶宮周甲誕辰以同姓親叅內宴賡
進御製識喜詩 慈宮及 上並有賞賜皆異渥也
純祖壬戌文獻公捐館承重持纓乙丑上庠己巳擢
文科拜檢閱辛未陞六品差別兼春秋因旱奉綸音
宣諭海西還以史官侍 上命開講特除公副校理
仍前席叅對蓋公以文學受知也 上嘗於後苑駕
前奏俗樂公同館僚奏曰御前當陳法樂 殿下讀
經傳何有此也 上動容從之前後屢在館職隨事
論諍懇惓多裨益差測候官及問事郎廳以母老陳
情乞郡御筆賜批許之出監松禾縣清簡爲治以訓

士爲先務入爲修撰檢詳兼文學 世子方講孝經
因文義每多陳戒常奏曰人主有過則其臣必諫
邸下如厭讀是 邸下過也臣豈不諍之乎連拜兼
弼善司書司諫獻納丙子爲副應教宗簿寺正丁丑
拜執義兼東學教授戊寅陞通政階大祝勞也除同
副承旨自是多入銀臺頻召見臨卷問難命題賦詩
宣饌頒賞或至夜漏除安邊府使設學廩蠲漁稅一
境安之辛巳入爲輔德大司成丁母夫人憂甲申叅
議吏曹時前啣人疏劾試望注擬之銓堂判書引入
公亦隨之 上斥言者補公法聖僉使尋授前職乙

酉拜江原監司廉惠如居縣時余於丁亥繼公布政
故知前政之美爲詳也入爲輔德 兩殿上尊號陳
賀由承宣進嘉善特授刑曹叅判兼同知經筵事拜
禮曹叅判大司諫戊子兼副摠管同知義禁府春秋
館己丑拜吏曹叅判庚寅充冬至副使除戶曹叅判
辛卯拜副提學癸巳擢陞資憲階拜漢城判尹知經
筵都摠管甲午膺陳賀正使還拜工曹判書十一月
純祖昇遐 憲宗嗣位追崇 翼宗以都監提調陞
正憲知 純祖實錄事拜大司憲兼知春秋丙申巡
察關北 慈聖教曰關北豐沛舊鄉邊朔重地須對

揚委寄之意也秋大饑凡係蠲寬懷恤之政靡有不
舉捐廩以救之移粟以賑之無一戶流者勸儒武蔚
興去後民鐫石思之丁酉坐微事罷旋敘拜禮曹判
書戊戌兼知義禁弘文提學己亥拜藝文提學庚子
拜吏曹判書辛丑陞崇政階玉冊書寫也判義禁府
事其後屢拜兵曹判書壬寅差留都大將同成均癸
卯入耆社差 孝顯王后山陵提調製丁字閣上樑
文加崇祿甲辰除左叅贊旋留守廣州乙巳孫祐命
入翰林推恩進輔國階丙午復拜天官因飭教行大
政前後兼承文院備邊司 太廟闕宮繕工監內醫

院尚衣院典牲署軍器寺奉常寺掌樂院觀象監掌
苑署提調間以書寫及敦匠事錫馬者再校正 三
朝寶鑑賚臯比已酉就養祐命江東縣令 上初元
佯問者臣起居賜衣食公受賜饋境內耄耄一鄉頌
之冬往寓鎮川鄉廬辛亥春考終 上撤朝遣禮官
奠賻以禮順寧備矣公朗潤端和其容儀也靜貞簡
恬其志操也早孤銜恤移孝王父居家之篤行也恪
慎不欺殫竭職事立朝之懿節也周急濟乏勿間疎
昵睦乎與族黨也忠告直諫無失故舊欵乎處交際
也身若不勝衣而遇之有介然不可奪者事若不經

心而辨之晰然有不可紊者不以榮悴易素守不以
平陂變恒規不有揣摩較計之念不藉攀援吹噓之
力以王父爲師而學有淵源以先世爲法而行由門
戶汎博羣書詞翰瞻雅兼有臨池之藝域內名山勝
水城隍古蹟樓臺靈區行旅遊宦之跡殆遍而題詠
扁額皆足以映發而輝耀公退圖書在傍籤軸在前
疏箋劄錄樂而不疲勤孜如韋布程課而自忘金紫
崇奕之貴鸞臺鳳閣之初受知 聖明歷 三朝眷
注靡替涉要津贊機樞上下往復於利害憂患之塗
者垂五十年風掣雲移滄桑屢變而終始令譽如玉

無點瑕者孰有加於公者哉詩曰不佞不求何用不
臧書曰謙受益易曰視履考祥公其庶幾乎此歟公
晚年戒盈思休退築小屋東郭外以花竹琴書爲娛
自銘曰守之以約卷以无悔休乎有容貞而不渝此
於公其傳神也歟元容公少友也後先入名途秩相
比而契相合尤以文字相好數追尋籬巷見公家道
齊而井井然有位置有規度允爲世閥柯則蓋公夫
人溫淑端潔閨壺雍睦公旣賢而又有賢配爲之相
公家之所積者厚而宜有以遺其子孫也銘曰
維稟之粹維質之美維文之華弗夸弗俚非維才性

維有是似其似維何有祖太史太史之文範驅蘇子
掾之埴之詩禮乎以譬彼弓冶得其神髓有苑其芬
瓊琚厥肆曰有啓沃經幄以置曰有絺績藝苑于致
非直鳴盛維需世器衡轄節符茂績咸底載彼康莊
無挫無躓率是澹虛何求何忮赫赫之崇其行也士
在家齊在官官理德與名全彝鼎攸紀維令聞無
疆銘刻是視

工曹判書洪公

學淵

神道碑

林礪洪公季習余友也友季習自踰冠時共遊學季
習頎然而長美風儀善談論余疎拙然意相得甚懽

也先後擢文科自侍從至卿列跡相比而業相類白首同僚耆社中間歲月亦多矣鍾漏珂馬之暇值丹葩弄禽雪月烟嵐之景或有杯樽翰墨之娛吾季父司書公李判書奎鉉徐學士憲輔亦俱焉此皆知公之深者而今不在在者獨余也山笛海琴安得無踴躍疇昔之感哉余於季習語默行藏居常凡百不得目攝而耳叅者無幾焉槩知季習言議事業別無寬巖超倫之節炳烺輝世之蹟可以聳瞻聆而夸來後者竊常以爲固不失古名門規範也今去公世纔五星霜耳每與朋知話舊論人居官之績則輒曰通鍊

綜理之如季習者安得復見乎論人飭躬之操則輒曰廉介不苟之如季習者安得復見乎論人處世之道則輒曰恬簡自守之如季習者安得復見乎余於是不能無今也則亡之歎而始知曩日之於季習如芳蘭之長與薰襲而不自知其爲異也嗚呼如公者安得復見於斯世乎公諱學淵季習其字林礪其號也南陽之洪肇自唐學士高麗初有諱殷悅官太師入本朝屢傳而至諱春卿觀察使諱天民都承旨諱瑞鳳佐 仁祖領議政策益寧府院君諡文靖號鶴谷三世湖堂爲世所艷公六世祖也府使諱處宙判

官諱九鼎贈吏曹叅判諱應運公高曾祖三世也考
諱景顏承旨贈吏曹判書以公貴也妣贈貞夫人德
水李氏堯欽女舉三男繼妣贈貞夫人全州崔氏贈
叅判復觀女舉二男公其季也母夫人方娠有夢虎
之異 正宗丁酉七月初一日生公甫周歲而孤及
長奉慈訓就功令業 純宗乙丑上庠癸酉登第甲
戌隸槐院丙子 惠慶宮襄禮時攝記注陞六拜司
諫院正言兼宣傳官辟騎省郎丁丑除持平出爲扶
安縣監縣屢經歉荒民不安業公盡心措施污萊闢
儲峙充而民無橫徵者民歌之曰枯骨免布我侯之

澤以穀爲山我侯之積已卯入爲弘文館校理南學
教授嘗侍講筵奏曰人君之所戒在安逸國朝寶鑑
羹牆錄卽 列聖朝謨訓所載鑑法而繼述則周成
不敢康之治可復見矣又曰昔故相臣金尙憲劄請
選方正篤學之士不拘科目立官號以輔儲君今
春宮睿學日就請旁招俊乂以輔德性又曰弭災之
道在乎順天心紓民力易曰損下益上謂之損損上
益下謂之益此古之聖王富厚則在民儉薄則在己
者也 上嘉之自是屢登經幄輒陳勉懇懇期有裨
益庠侍講院司書兼文學差問事郎特除掌令有星

變差測候官又差籌司郎壬午除副應教獻納兼司
書弼善因歲饑奉命直指關東及還以未量九邑之
濫稅請行覆審以列邑結役之偏重軍伍之虛疊糴
費之浮濫並請著式釐革以海邑魚鮮之廉價請從
市直又陳驛騎濫把及武臣乘車之弊廟堂覆奏採
施東民鑄石以頌之癸未丁母夫人憂盡禮無悔且
權奉靈筵饋奠終喪期日以吾情理異於人也乙酉
歷司諫獻納司成諸職秋 上與 王世子親祭
健元陵以定鼎漢師之舊紀賞諸享官公與焉陞通
政階除敦寧府都正刑曹叅議同副承旨丙戌出爲

谷山府使清簡爲治吏民安之尤於課訓儒士致意
焉丁亥入爲承宣尋除冬至副使引遞秋關北警水
翼宗以世子代理極擇吉州等五灾邑守宰并以文
宰及堂上官特差而公得北青召見諭以對揚之意
公卽叱馭踰嶺上官訖見吏民宣布朝廷恩德劃公
穀捐官廩飢口六萬賴以活辛卯內移癸巳爲安東
府使甲午棄歸 憲宗乙未拜大司成吏曹工曹叅
議丙申 孝和殿行酌獻禮以堂上執禮陞嘉善階
拜漢城府左尹工曹叅判兼同知經筵義禁府都摠
府副摠管丁酉除吏曹叅判內瞻寺提調戊戌拜小

宗伯尋授京畿監司秋大歎疏論城餉轉輸之弊請
捧留本邑又請劃賑資本道穀及兩西湖南穀數萬
斛巡排均調民忘其灾 上幸 綏陵公以道伯領
臯比之賜庚子入爲同中樞辛丑以特進官侍晝講
奏曰臣於昨夏叅講采薇章今周年講彤弓章 聖
工如此而何以望將就乎言多剴切 上動色差承
文提調癸卯拜同敦寧兵曹吏曹戶曹叅判兼掌樂
院提調甲辰兼觀象監提調嘉禮時以都承旨進圭
陞嘉義階拜大司憲後屢拜戊申陞階資憲以子爲
侍從推恩也除刑曹判書分內醫院提調廣州府留

守是年入者社庚戌春 上遣度支郎存問賜衣食
之資入爲知經筵知春秋都摠管辛亥除工曹判書
壬子九月十六日考終壽七十六 上致賻遣官吊
祭合祔楊州默隱里癸坐之夫人墓右配貞夫人全
州李氏叅判義綱女生 英宗丙申四月二十九日
卒于 純宗甲午三月二十七日夫人慈懿令朗事
姑孝爲宗黨所範男秉壽文承旨女李啓龍繼子裕
謹秉壽子輔燮進士公幼而孤以未識嚴顏爲至慟
事母有孺子愛及貴備盡志物之養友諸兄睦同宗
盖人倫之篤天性然也峻標坦襟不喜矯飾鵠立班

聯重厚軒舉而粹然有冲和之氣對人不設畦畛未嘗雌黃而見過失溫言箴警自少喜看書歷代事蹟國朝典章無不博記而多蓄以至書藝筭數之學亦窺大意文學政事法理之術皆公所能而恂恂然退讓謙虛恥爲沽衒於世故瑾瑜之所懷握者固多蘊采而潛輝且恬靜不求歛迹要津雖以清操雅望推遷躋卿班而回翔閒散未見盤錯之遇試此可與知公者道也槩嘗論之至行根天愉婉深愛竭誠養志喪祭以禮如其孝也發軔亨衢芬華炫前靖獨自守利名如浼終始一節瑕類不點如其貞也屢經藩府

約已裕人志勵載石澤洽五袴所過遺愛衆口成碑如其惠也記昔公之官北也余亦有會寧之行公迎我於青海之濱把酒賦詩官燭屢跋而時民憂頽洞如津無筏及還公已旋車而州父老見余道公政理之美聽之如讀西京循良傳也公旣用之未究其將後祿之有未艾者耶銘曰

書曰其心休休然如有容詩曰不忮不求何用不臧語曰以約失之者鮮易曰視履考祥若此者君子人歟君子人也昔者吾友嘗從事於斯處于家則本孝友而推嫺睦歷乎官則服忠信而蹈槩規與人交而

使朋友久而益敬爲州政而使小民去而常思澹榮
利而歛避乎要廛雖曰蘊抱之未及布施金紫之顯
龜鶴之邵神所以報善者如式如幾獨超然於毀譽
得喪之域允矣完名而全歸松臯之黃墟邈矣斯世
知公者其誰瞻彼揚旣貞珉之刻誰爲銘者其友經
山子之詞

弘文館修撰贈吏曹判書金公

義貞神道碑

惟皇天欲平治邦國必縱聖作之后降賢佐爲之輔
臣主同德久道化成以膺鴻厯昌熙之運我 仁宗
大聖也有若金公義貞與金公麟厚爲時徹儒明良

相契庶幾匹休典謨而鼎湖龍飛二公竟從之嗚呼
天不欲平治邦國耶旣縱而降而又闕而施之不卒
何歎忠臣志士之淚安得無痛恨於氣數來往之理
歟今 上巳未臣以元輔侍賓筵奏曰金某 孝陵
名臣也學行節義與金文正二而一也久爲士林所
宗仰敢以聞 上可之特命贈大冢宰文苑提衡雲
孫奉黃誥議顯刻阡道屬以銘作而辭曰公之世遠
矣非後學所可揚厲也請益固又作而言曰嘗聞諸
先正先修之所論定者矣初公自鄉升太學慕齋金
文敬奇之曰廊廟器也及瀛嶠被召晦齋李文元贈

言曰瑞世之鳳也東臯李忠正嘗歎曰此人清而剛
所遇必盡節靜菴趙文正讀公文驚曰詞理造奧果
經學中人退溪李文純詩篇寄贈道義相許清陰金
文正記撰至謂文章節義並行不朽諸公豈私好公
哉其言之徵信來後奚啻縑竹之所載鼎彝之所名
哉謹按狀公字公直豐山人以高麗判相事文迪爲
始祖六傳而諱安鼎官三司左尹生諱子純仕本朝
軍器直長生諱從石早世贈吏議生諱徽孫珍山郡
守公高曾祖也考諱楊震有文行工曹叅判弘文館
提學錄清白吏號虛白堂妣貞夫人陽川許氏瑞之

女左贊成屏之孫也公生弘治乙卯稟質端重才識
超倫五歲而讀書八歲而屬文四部文旨義難曉者
過眼輒辨析見者曰江文通無過九歲丁內憂哀毀
如成人及長掃一室扁曰黃卷樓屏謝外客潛究性
理主經翼史貫穿博洽丙子上庠丙戌擢文科選補
弘文館正字陞著作博士修撰兼知製教侍講院司
書時 仁宗毓德承華公以啓迪將就爲已任每臨
經論說出入皇王天人之道睿知日廣禮遇日隆爲
權壬所擠屏居豐山別墅東臯李公貽書勉韜晦識
公之亢直難容也乙未遭叅判公喪廬墓爲終身計

癸卯與金文正同拜玉署之命翌年而值 仁宗初
元益感殊遇竭知裨贊行見德化之盛改歲而仙馭
上賓公驚隕擗號托病還鄉不接人不與事自號潛
庵蓋取勿用之義歟名居坊曰五畝名其子曰農丁
未 孝陵制閔疾作却藥而終享年五十三葬醴泉
廣石山某坐原從祖宅也公生有異質清粹剛正而
好學不倦通經博古立志以賢哲自希出世以致澤
爲期好善疾惡道所存也急病讓夷義所適也常讀
心近自警等書於小學尤得踐履之工已卯間俊良
登崇多更張人賀以復見古道公憂曰非時措也及

敗賀者復毀之公奮然曰道非不美也言者屏息在
朝愠羣小擯嬰者數而怡然不介意壁立卓節不以
勢利屈而禍福怵及遊滄雷之肆與金文正同被非
常之眷魚水風雲千載一會而雲鄉遽邈孤忠莫效
與金文正往復詩篇多憂傷悽悲之辭如騷雅之遺
音焉爲文不求工而淵涵醇正類先古軌範如踐形
賦紀綱賦俱在東文選今有逸稿二卷藏于家配淑
人金氏系安東平壤庶尹璠之女閨德稱配君子先
公十一年而卒葬公墓之東岡一男農官司議贈承
旨五女忠義衛沈守慎驪江君勻忠義衛安祺奉事

安岫生員鄭彥福其婿也農之男大賢縣監贈吏叅
庶男祥賢同賢直長愛賢叅奉豐賢五賢武科二女
李信僉使金弘一其婿也大賢之男九人奉祖進士
文科持平榮祖生員文科吏曹叅判昌祖進士都事
慶祖生員縣監延祖進士文科正字應祖生員文科
右尹念祖生員典籤贈承旨述祖崇祖進士文科注
書三女李義遵直長張友程金起秋其婿也玄孫以
下多不能盡錄公前贈直提學以曾孫榮祖貴也今
超贈正卿以朝典崇賢也公豐於賦而嗇於命志與
行違位不稱德宜乎留餘裕後而宗支之繁昌門戶

之顯赫此其神所以報之者歟銘曰

於戲 仁宗乃聖乃神若古舜堯有臯夔臣其臣爲
誰公哉若人氣剛志壹言質行純淵淵洙洛溯源尋
津弗奪弗擾規渠蹈循蘊則圭璋動則鳳麟帷幄啓
沃文正協寅龍象虬漏非道不陳契于聖心予臣予
隣載導皇輿泰階庶臻洪熙乾象何運之屯國士曷
報報以心身歸侍玉欄遂厥忱恂一是正直孰緇孰
磷忠以終事何屈何伸今視公門何其振振逾遠彌
昌令名不湮廣石罍如之臯山則崑而水則潏猗嗟
乎此其人之藏歟過者必肅曰 孝陵之臣也

知中樞府事兼吏曹判書李公

若愚

神道碑

本朝以文持世朝廷推卿宰中長文藝者圈其名提
衡三館主盟詞壇膺是選者歷屢世可摺數也惟延
李寂爲多系譜輝赫冠氏族近文簡李公世其家又
準廷圈士望益重之公名若愚字景容壺居其號也
貫延安始祖茂唐中郎將仕新羅封延安伯入我朝
有諱石亨三場壯元官判中樞府事錄佐理勲延城
府院君諡文康號樗軒四傳而有諱廷龜左議政諡
文忠號月沙諱明漢吏曹判書諡文靖號白洲兩世
典文衡於公爲八世七世再傳而有諱正臣戶曹叅

判贈領議政是爲公高祖生諱吉輔工曹判書贈領
議政無嗣取叔兄 靖陵叅奉贈吏曹判書諱得輔
之子諱性源爲子左議政諡文肅公生諱崑秀藝文
館檢閱兼 奎章閣待教賜號壽齋後贈左贊成早
世文肅公命公爲之後敦寧都正諱洛秀子文肅公
伯氏大司憲諱心源孫也妣贈貞敬夫人達城徐氏
社稷署令贈吏曹判書有後女領議政志修孫女也
本生妣淑夫人江陵金氏吏曹判書華鎮女也公以
正廟壬寅七月十九日生 純祖庚午中進士癸酉
除 康陵叅奉旋移 世子翊衛司副率秋魁到記

直赴增廣殿試丙科乙亥陞六癸未通政丙戌嘉善
辛丑資憲戊申春正憲秋崇政冬崇祿己酉晉輔國
歷官承政院假注書注書承旨自同副至左成均館
典籍大司成侍講院文學輔德司諫院正言獻納司
憲府持平掌令大司憲弘文館副修撰副校理應教
兵曹佐郎叅判判書吏曹叅議叅判判書刑曹叅議
叅判判書禮曹工曹判書漢城府左尹判尹議政府
左叅贊兼帶則文臣宣傳官知製教司書輔德東西
學教授同經筵同成均同春秋知春秋同義禁知義
禁弘文館藝文館提學判義禁都摠管判敦寧備局

耆社纂輯廳上號都監堂上進講官日講官知寶錄
事司饗院副提調司圃署掌樂院承文院司譯院分
內醫院藥房 景慕宮司僕寺宗簿寺典醫監提調
奉命則冬至正使伴送使外職則安東府使江華留
守京畿監司水原留守通擬 奎章閣直閣弘文館
副提學入文衡圈點纂輯文獻備考 三朝寶鑑製
述 翼宗大王追上尊號上冊寶時 太廟樂章及
王大妃加上尊號樂章 憲宗大王諡狀 徽慶園
遷奉表石陰記以 哲宗庚申閏三月十四日考終
壽七十九戊贈如儀賜諡曰文簡五月克襄于楊州

蘆原良坐之原從先兆也取坡平尹氏縣監行勉女
配焉一男二女男淳翼今承旨女判書金鼎集叅奉
朴齊萬並短年無育公備內行事太夫人甚愛愉婉
志先於物慈孝無間言有一弟樂院正相篤友風雨
對床論古談文湛翁如墳箴及歿無嗣公輿病造湖
西擇族人子定后每日早興盥巾怠容不設凡於芬
華勢要進取之事一切壁豎而界畫凡於得失臧否
毀譽之論一切城防而瓶守樂易祥和存中著外待
人無逃昵祛哇眈致欵曲見有一識一藝之長不啻
若已之有慰薦汲引惟恐或遺居試院與選部訪淹

滯好振拔遇製作佳者獎誦久不忘前後侍講筵論
辨剖解卞明旨義輸忱懇倦期有裨益宸衷傾注屢
蒙開納其出外而爲政嘗字牧矣嘗旬宣矣嘗保釐
矣慈惠廉約一有成規察不至苛寬不至縱不皦皦
而不汶汶吏憚民懷去後皆有遺愛謙儉畏慎恬於
榮名家居絕干求寡尋訪坐席當膝處穿弊輒糊紙
以補大耋衣綿布食無別味至窮乏有求好周施以
濟之策名五十年躋上卿遍清要一不藉攀援因衆
望之屬之者也上而被三朝眷遇下而爲士類所
誦始終上下於平陂利害之塗而虛舟自在貝錦不

至其非志操言行之孚衆者而能之乎公於文性也才也且世也生而穎悟殊凡兒學語便學字嗜好成癖手不停披丹鉛籤軸與同寢食至皓首不徹夜輒燃燭照字床頭短檠到曉常熒如也上自經傳箋疏以逮史策表志靡不研精而蹟微至于星曆坤輿算術之學推溯原本尋繹軌範雖秘簡奧典僻編異錄聞輒搜徵細加繙閱總括採摭廣畜旁通叢雜稗類之門亦辨纂輯人爲誰記聰蓋如此津澤之所溇英華之所發形以爲言不繹不沉非鏤非雕雍容紆餘委曲鬯達自成一家之體非標擬擗摺者所可比也

公自言古體我不能今體我又不能惟可從順自好而已余冠而遊梧軒金尙書之甥館金公謂余曰士當爲學當求友資益吾弟與甥有好文者汝可友之蓋指寤軒金侍郎啓溫及公也余果與二公相好有文與詩每問答論難寤軒中身而止公同入者社逢迎者數數而書牘日往復者金石典冊之辭管絃咏歌之編疑義之辨析奇書之評賞可謂同契同趣如金如蘭而今使余述公平生而表敘之能不爲之望黃墟而悽然乎嗟乎夫其多言乎哉昔廬陵子論梅學士曰清慎好學君子也余於公亦云銘曰

於赫延城世濟其美其世維何丞相太史鼎彝德業
締繪文章韋平錢蘇邦國之光公維繼起有本有源
六藝九流蒼蔚羣言秩秩涵涵燁爲華英縱駕籍園
先軌是程瓊玉其質鸞鳳其儀端雅恬約始終一規
其在講幄懇懇純忱其在藩司藹藹仁心朱門如水
兀兀陳編圭組韋布城市林泉介石貞操孰磷孰緇
一代重望 四朝殊知博古淹識展爲猷謨賢類所
與後生所模有茁庭蘭前武克繩其友作銘來世庶
徵

左議政朴公

晦壽

神道碑

國都東三十里楊州槽巖洞乙坐之原壺下朴相國
藏也今去公之世三數年而都人士相與語曰凝重
沉靜臨事不撓安得復見如公者乎偉碩秀整飭躬
爲式安得復見如公者乎况同朝卿士之常所瞻望
而依恃者乎公緒忠貞而紹詩禮自少器宇識量爲
朋儕所推重通籍初已負宰輔望歷事 四朝眷注
俱隆相我 兩聖四膺甌卜謨猷所施利澤所及有
不可量名全德完而朝野所咨嗟思慕者有若需用
未究者然豈無所以而然哉 憲宗乙巳正旬 上
御崇政門行朝叅諮訪治道時公詣九卿班特旨擢

公拜議政府右議政宣諭諄復懇至公出謝 上喜
曰卿造朝國事幸也至戊申公屢辭疏優批不允今
上乙卯公年屆七十引禮經乞退不許仍復拜右議
政翌年公連上辭章 上答曰國家之倚仗而安危
之者耆德大臣也卿若決意而去國家誰與爲也今
卿之去猶去支廈之木雖欲無傾其可得乎又三禩
而進拜左議政公前席而懇又不許明年又拜左議
政公以老病辭批諭曰卿憂一身之病予憂一國之
病移彼醫身之方做此醫國之功及卒教曰此大臣
恬雅豈弟之姿端詳謹慎之操寡人之所倚毗也朝

野之所想望也平日精力尙有所恃許解相職爲便
調理遽見逝單甚爲愴盡嗚呼爲人臣而得華袞一
言之重尙可以垂輝來世况以 兩聖則哲之明德
量風度之褒識慮謨猷之獎視古碩匹美而以進退
關民休戚以去就係國安危倚恃以支廈之木委毗
以醫國之手巍乎王言炳若日星奚啻如彝鼎之所
刻竹帛之所載也哉公信心直行犯顏正言 翼宗
代理時以承旨請罪一近宦 世子欲自內勘處公
曰褻御雖微嘗當蔽以律宮府宜一體 世子從之
曰奏辭誠得體 憲宗時言官有獲罪者公以相臣

奏曰古以直言極諫設科目以拾遺補闕置官名皆
所以來言也今 殿下摧折言者聽受之量何未恢
也宋建隆以來未嘗以言罪之仍請敘被罪言官
上改容曰卿言嘉矣豈不從乎武監輩喧鬧閤門外
公奏曰我朝家法嚴肅近習有罪必倍律挽近法綱
解弛中官之街路呼唱幾如朝紳掖隸之放肆作挐
每多駭聽此皆防微不嚴之致也凡倖門非但指朝
廷官職僕隸微末一踰恒法皆倖也先自宮闈內惟
倖是杜焉內司請爲明禮宮設鹽釜於巨濟浦公慮
貽民弊請罪陳告者時新設摠衛營公曰用度多出

經費營屬恣橫作弊必省約而操束焉 上曰卿奏
切至極用感歎仍進戒曰 殿下宮室之安錦玉之
美儀章文物之盛臣工師旅之養皆小民之忍饑寒
疲筋骨銖積寸累之餘者也臨御一紀實惠未究疾
痛窮窘之呼 殿下必不得以聞鞭撻剝割之狀
殿下必不得以見也夫已私不克則不急之務無益
之作雜進於耳目之觀而民隨而困矣伏願靜以養
心克祛私意焉 上動色曰陳勉出忠愛之誠當服
膺矣時闕內有木石之役公曰聞大內營作之工新
荆舊葺役力相仍雖曰不勞民其實皆無益不急之

務又耗財用而損儉德財豈不出於民乎 上稱善
時有嬪宮揀擇之禮公進曰儀文度數服飾器用務
尚儉約爲省費且惜福今 上朝公勉戒曰前請開
講尚不敷施是 殿下不信臣言也 殿下未嘗一
行則臣亦何敢信 殿下之言乎君臣不相信措國
於何地乎臣每夜彷徨自然流涕且君臣不問答何
以爲政今日顯達任務之人自上不識何狀庶事叢
脞八方困瘁而莫之恤乎又進保晉之說曰節欲爲
本戒慎起居精神內守然後外物不能誘奪矣 上
曰感卿眷眷之忠公性醇正以進思補過自勉上意
之所向者必輸衷盡言每前奏聽者竦然色變然誠
欵爲上所孚屢稱以忠愛所發公常言主德成就在
典學民業安保在司牧 純廟時長帶玉署公上直
輒行講對以公善音讀而長文義也 翼宗在春邸
講奏多稱旨公亦自任輔導臨文敷奏上而歷代典
憲之制下而小民怨咨之情援引旁達詳該剴切誠
動辭表輒賜嘉納嘗夜坐壽康齋召見曰聞在瀛署
欲見召之耳使讀經書聽之 憲宗及今 上朝筵
對必勉學曰治亂之分在此矣言民事則以擇循良
爲先每以漢帝之慎惜郎官唐宗之書名柱帖請爲

鑑法灾邑不勝任者請亟罷九考經日淺者請注用
國家之大典禮大儀節議詢多及於公 純祖之世
室稱祖 仁陵 綏陵及 徽慶園遷奉時 大王
大妃殿服制春秋 陵行時服色今 上嗣位後
翼廟祝式 真宗祧禮 純祖室孝正殿追上尊號
皆公所獻議者也公潘南人諱晦壽字子木新羅赫
居世之裔也麗季直提學諱尚衷世稱潘南先生子
諱訔入本朝右議政平度公策佐命勲四世而諱紹
司諫號冷川其後有諱東善左叅贊貞憲公諱烜吏
曹叅判錦洲君忠肅公諱泰尙吏曹判書大提學文

孝公號晚休公之五世祖也高祖諱弼純禮山縣監
贈吏曹叅判曾祖諱師任同知敦寧府事贈吏曹判
書祖諱麟源工曹正郎贈左贊成考諱宗羽同知敦
寧府事贈領議政妣贈貞敬夫人靈山辛氏通德郎
命聖女公以 正廟丙午三月三日降嶷然不類凡
兒長而秀美凝重見者知爲遠大器婦翁竹石徐太
史嘗稱曰廊廟材也 純祖庚午上庠甲戌筮 懿
陵叅奉乙亥換中部都事移翊衛司侍直濟用奉事
用 惠慶宮園所都監監造官勞丙子陞六擢文科
拜文兼禮曹佐郎丁丑拜司諫院正言侍講院司書

戊寅特除兼司書以館職前兼啣之無古例雖還寢而示眷注之出常也已卯拜兵曹正郎庚辰出爲龍岡縣丁母夫人憂辛巳議政公棄養荐罹巨創哀毀幾滅性癸未制闋拜弼善甲申特除弘文館校理兼弼善成均館司成平安道京試官副應教兼文學乙酉拜司僕寺正奉常寺正司憲府執義連帶玉署春坊除誥迨無虛月而特旨居多 翼宗代理時知公通鍊謹厚欲與共國事頻召詢事注顧日隆公退讓恂恂如也特拜承旨自同副至右兼三院副提調以寵之拜禮曹叅議丁亥加嘉善階 徽慶園親祭時

承宣也陞都承旨兼同知春秋館義禁府經筵轉戶曹兵曹叅判漢城右尹出爲公忠監司 世子謂曰民生困瘁湖西尤甚授卿方面予意有在公威惠並濟明年歲飢公捐廩賑救御史褒奏公疏辭 世子曰大賑餘也卿不可遞矣及瓜入爲吏曹叅判兼世孫講書院左諭善庚寅五月 鶴駕上昇公痛哭屏鄉廬辛卯兼司圃提調壬辰陞嘉善階 文祐廟入廟時享官也歷工曹叅判兼承文院有司堂上癸巳膺進慰兼進香副使甲午拜弘文館副提學成均館大司成差備邊司堂上十一月 純祖昇遐差行

狀謚狀撰輯堂上乙未進資資憲虞主書寫勞也除
漢城判尹刑曹判書大司憲兼知義禁知春秋都摠
管實錄廳堂上丁酉拜平安監司律躬清嚴百廢俱
興庚子以年貢正使往還拜禮曹判書壬寅兼同成
均內醫院社稷署司僕寺提調籌司有司堂上拜兵
曹判書以禮判奉審北道各 陵寢還差 孝顯王
后山陵都監堂上甲辰除吏曹判書躋秩崇政判義
禁加望也拜左叅贊乙巳春膺枚卜兼 宗廟署內
醫院 景慕宮奉常寺都提調辛亥兼 憲宗實錄
廳摠裁官御營廳都提調乙卯兼 徽慶園遷奉時

都監都提調丁巳兼追上尊號都監都提調戊午出
拜廣州留守時南漢凋弊 上特命公教曰保釐之
責借卿威重公請貸戶曹納之六千兩錢限年屬本
營措劃得宜一營改觀賜田土臧獲以請謚承襲正
使也錫廐馬者九領豹皮者五以敦匠書寫裸獻勞
也辛酉考終于正寢壽七十六訃聞撤朝三日成服
日遣承旨致祭仍命祿俸限三年輸送嗣孫待闋服
調用哀榮之典備矣以禮月克襄初配徐夫人籍達
城判敦寧榮輔女繼配李夫人籍全州學生元常女
婦道甚備並從祔取從兄楚壽子齊承爲嗣文科正

言早歿庶女適徐相民齊承二男長攸陽次幼出爲
從伯叔后公姿質粹美標裁秀重秉心正直臨事周
慎歷官內外受知 四朝及典句輟以輔君德庇民
生爲任輸忱竭誠不撓不奪贊君德之要則杜僥門
而戒逸欲也揀民生之本則紓窮困而達幽隱也四
持相印確守一規不變舊章功效自至古之向敏中
之盡心民事杜正獻之未能忘國呂正惠之持重識
體公庶幾有之矣余於公自少托契最深奉諄誨於
黃扉之間者近數十載有疑則質有難則與淵慮石
猷每以爲不及也互往還於樹亭小隱之間蒼松翠

竹皓髮相對嚮住鄉廬聞公疾亟驚往視之公色欣
雜呻吟斷續語者皆民國憂也騎箕之明年南方民
多擾余獨居相府憂虞瀕洞之中四顧踴涼此時不
欲思公得乎賢從姪叅判君屬墓之銘豈以知公之
詳今世莫余若也歟銘曰

維潘有聲世承宏碩冶錦暨休載名竹帛繫公嶽降
迺發于積姿質珪璋風裁鸞鶴慮有濬淵守則峭壁
規周矩旋一是正直契于 四聖眷毗隆渥主德日
躋公時經幄民歌于巷公時藩服握衡兩銓望愜揚
激三領敦匠四膺往役臨朝諮訪特授勻軸曰吾相

定非夢非卜德度量才猷勞績先王所遺百辟所
式醫國之手支廈之木休休斷斷卿心予識公拜稽
首壹臣心力盡忠補過卽臣素蓄食息不忘惟民惟
國不愆成憲不動聲色朝奏夕行浸潤闔澤有體有
業前烈是則士民曰咨覓想夙昔令名齊山槽巖之
宅知者其友勒銘于石

經山集卷十五

經山集卷十六目錄

墓碣

族姪吏曹叅判

基一

墓碣銘

敦寧府都正崔公

璜

墓碣銘

族人戶曹叅判

彥儒

墓碣銘

贈直提學朴公

麓

墓碣銘

戶曹叅判山雲李公

亮淵

墓碣銘

吏曹判書李公

嘉愚

墓碣銘

義州府尹李公

勉求

墓碣銘

贈吏曹叅判李公

啓禎

墓碣銘

鄭錄妻李孺人墓碣銘

顯忠祠碑銘

墓表

高祖考進士府君墓表

曾祖考贈吏曹判書府君墓表

王考大司諫贈左贊成府君墓表

先考敦寧府都正贈領議政府君墓表

仲父工曹叅議府君墓表

經山集卷十六

東萊鄭元容善之

墓碣

族姪吏曹叅判基一墓碣銘

吏曹叅判鄭公基一我家十世宗孫也鄭氏籍東萊麗朝左僕射諱穆始大顯入我朝諱龜齡薦德行始仕世宗朝官結城縣監生諱賜直提學生諱蘭宗吏曹判書東萊府院君贈領議政諡翼惠生諱光弼領議政配享中宗廟庭諡文翼生諱福謙江華府使生諱惟吉大提學左議政號林塘生諱昌衍左議

政號水竹生諱廣成判書號濟谷生諱太和領議政
配享 顯宗廟庭諡翼憲號陽坡生諱載岱蔭叅議
生諱勗先都正生諱錫命進士以仲房進士諱錫慶
之子諱元淳爲嗣翰林正言生諱東愚三世俱無年
以季氏蔭掌樂院正諱東愈之長子諱文容爲嗣蔭
僉正贈吏曹叅判卽公考也妣贈貞夫人海州吳氏
命心女叅判遂采孫也我鄭世有聲聞結城公之厚
德至行直學公之學術志操東萊君之文武全才文
翼公之領袖士林江華公之純孝篤學林塘公之文
章事業水竹公之忠貞自守濟谷公之秉義卓節陽

坡公之柱石王室此固彝銘旂紀之所輝耀院祠俎
豆之所表章其非雲仍之所可私也繼而叅議公之
仁信廉謹都正公之敦厚儉飭正言公之英才峻望
樂正公之高文博識僉正公之愨重鍊達所謂世其
家而踵厥美者也世之稱鄭家法者曰敦實行刪浮
文避名譽守節義恪職事遠世利率以忠謹質儉爲
規矩是故人之初見鄭家子弟者不問而可摸索然
此法今浸浸然降矣公顯後常謂余曰吾家以顏氏
之訓有石家之風每一言動一事爲輒思得無有墜
典逸範乎惟忝先是懼恒存兢兢業業之念吾是以

知公之能顯其世者也惜乎公之不能久於行而使
後生觀感而矜式也公字大始號竹下以 正宗丁
未九月十三日生而聰穎超羣學語便能讀詩史
作句從曾祖判書修井公竒愛之常遊樂正公側日
薰染經史箋詁及古賢格論通敏之識而觸類引長
勝冠名振士林待以宰輔之器公亦自負甚重常居
循繩墨而尋軌範練典章而綜事情如懷珍不售者
而及唱名黃甲晉秩緋衣舉止安詳風儀端凝若綠
玉之新出櫝而丹鳳之降高梧也同朝爲之屬目而
亨衢方日闢矣 翼宗在東宮公久處桂坊以學藝

受知有御製輒令賡進屢褒賞自代理後眷顧隆重
已丑元日用承宣勞陞秩是年王母李夫人年九十
依國典領夫人誥旨於辭秩之書睿批有曰卿家之
事甚希異可謂家國同慶一世榮之連處邇密睿注
將大用清華除旨殆無曠月內而銓叅籌謨外而字
牧旬宣世方以館閣巖廊期之而忽如良驥之行未
半而中路蹶蹄此奚止家門之私恨而已抑爲朝廷
咨歎者也今公之胤入內閣榮進方始是公之所論
而成公之志者歟公以癸酉司馬戊寅丁外憂壬午
翊衛司洗馬遷侍直翌年陞秋曹郎敘除敦寧府主

簿移西部令丙戌中別試甲科例陞通政階由刑曹
叅議轉同副承旨丁亥爲楊州牧使乞養也戊子以
吏議召還兼侍講院輔德拜國子長諫院長己丑元
日賀禮禮房承旨加嘉善階拜禮曹叅判兼同知春
秋館義禁府經筵副摠管丁王母憂承重守制壬辰
歲饑禁酒御筆特除漢城右尹 憲宗丙申拜吏曹
叅判出爲黃海監司修祀典興儒教律已廉以簡爲
政寬以惠載寧地有舊傳庄土之混入民田者準直
償于民民至今頌之列郡多豎碑寓思戊戌拜刑曹
叅判兼內資寺提調庚子連拜知申事壬寅拜大司

憲差備局堂上十月五日患風痰考終壽五十六葬
忠州崇善里乾坐之原配德水李氏進士家鎮女生
乙巳十二月六日卒甲子七月七日贈貞夫人葬果
川社堂里負丁原繼配貞夫人光山金氏僉樞魯儉
女生己酉九月十一日卒辛丑六月三日初葬竹山
廣惠院至是合祔柔嘉有閨則舅黨咸稱焉舉一男
一女男健朝今承旨女適李奎魯公美姿性而修勤
儉守先範而篤天倫事親之孝奉祀之敬敘族之睦
待人之誠奉職之謹慎處事之周密皆人所難能而
公之所安行者也今狀公而先之以世德者爲使吾

門冢孫世世思所以繼之也銘曰

其祖先有美焉有善焉爲子孫者其可不知之耶知之而身比焉者蓋鮮矣其奈天賦之才與姿惟公穎俊精敏之器胡豐其具而不博乎施施之未卒者必有積積之所發者必有時公世短而來世甚長質之神而載辭於碑

敦寧府都正崔公璜墓碣銘

此敦寧府都正崔公璜字國輔之藏也其友經山子呼其字而書石而銘之曰余知國輔六十年非余銘子孰子之銘國輔善交友友國輔者多儒雅聞望之

名家子如壺下朴相國梧墅朴相國慎庵曹冢宰冠巖洪冢宰履坦齋朴冢宰脩石鄭宗伯怡室李叅議諸公自少談論切磋相資益余疎蕪無可輔然交密而久不衰亦與其余性之好善而志學也歟後諸公皆公卿之顯而出入光寵赫然獨國輔拓剝無所成學益博志益堅辨論益高豈曰無所成哉亦足以成其志也公自守雖狷潔外不自異老而亦喜與朋儕遊對之如香木文石風水齧蝕而光液凝結絢采微現又如崩巖窈谷孤遜之流與靚葩翠羽相雜蓋胷中輪囷蟠蓄卷結之氣旣不得聲之爲笙磬象之爲

藻火而茶熟酒闌之頃揮麈擊壺縱橫上下之論多
慨慷激昂驚座之言泠泠乎楚騷之音而燕市之歌
也聞人有過失輒引古法詮格訓面折之少怫意色
益莊謝之卽怡怡去崖谷余或把國輔袂戲曰索居
久矣願聞過國輔笑余亦笑相視且莫逾自國輔去
此道從以陵夷能不重爲之嗟嘆乎剛直恬介之性
也淹該閎肆之學也通敏精鍊之識也使公任平章
則必著縑素紀載之績使公履危難則必樹瓌偉勦
截之行而遇不遇存焉持此而恨公則豈知公者哉
海州之崔以麗朝文憲公諱冲爲祖本朝有副提學

諱萬理獻納諱世傑直講諱慶昌號孤竹孫曰郡守
諱振海號櫟村子曰縣監諱碩儒寺正諱碩英子曰
領議政忠貞公良齋諱奎瑞文憲之德望副學之清
白獻納之諫諍孤竹之文武全材櫟村之詩文高名
縣監兄弟之師門學禮良齋之扶鼎勲業皆照耀於
國乘間史何崔氏之多賢也世推爲望族忠貞公實
寺正公之子而後縣監公官文衡上相配享 英宗
廟庭生諱尙震縣監生諱駿興郡守次子正郎諱運
興繼從父知敦寧諱尙鼎郡守公生叅奉諱粹全取
正郎公之子通德郎諱粹一之子郡守諱言憲子之

卽公之考也妣淑人揚州趙氏學生諱榮素女正言
諱炳彬孫也母夫人有異夢而公以降 正宗癸卯
五月六日也秀穎殊凡兒及舞象整衣讀四子書辨
訂箋疏同異作字有體法篤內行好修飭步步趨趨
如繩墨之者勝冠入泮試儀標如美玉舉止端凝詞
賦亦有聲老師競奇之曰良公門其復昌乎癸未筮
齊陵叅奉陞司宰奉事甲午由司饗奉事入翊衛司
侍直時 憲宗冊 世孫開書筵公入對因文義懇
懇規誨 世孫注聽悅其言多所裨益嘗親寫五大
字賜之示異數也 世孫讀小學公進曰睿知與未

讀時何如答曰有勝公曰若躬行則益有勝矣 世
孫嘉之公之隨輒牖導皆類此十一月 憲宗嗣位
桂坊叅下官皆調六品乙未差 山陵都監郎廳拜
義盈庫主簿義禁府都事以 景慕宮令出監山清
縣按使彝齋權相國與語敬之曰惜哉屈也爲政嚴
清有執而無撓糴逋累巨萬報上司具聞于朝損價
劃移逋完而民歌之號爲鐵巖太守鑄銅頌之陞守
沔川棄還鄉里甲辰甄拜居昌府使吏懼民悅一如
莅清時畿縣之積城窳弊甚廟堂請擇其守竟屬之
公尋解歸時 上崇吏術思勸勵之政簡選前後所

薦治理效者付賤臣臣以領相筵擢四人授通政階
俾開晉庸之路公與焉旋拜敦寧府都正癸丑六月
二十八日考終葬于龍仁縣魚谷子坐原從先兆也
配贈淑夫人東萊鄭氏僉樞東祐女領議政陽坡諱
太和後也婉順備婦度舅姑常稱之曰善事我生子
正宗壬寅八月十四日卒于 純宗甲戌三月一日
權厝陽城粉土谷坐丙原男永錫前判官女適李儒
明繼配淑夫人青松沈氏學生東元女子長錫次定
錫系季父府使公女幼公誠於奉先十世以下墳墓
石儀誌文俱備又刊行良齋年譜庚寅八月 翼宗

殯宮火公以監造官冒焰直前瞻審梓宮後常自歎
曰其日不死而生生苟也因自號曰苟庵此可見公
以之之一節歟爲學本經翼史爲詩文有典則而縟
粵可喜所著有苟庵副墨十六卷所劄錄有諸子抄
畧十二卷詩叢六卷易禮抄錄昔國輔家西園多種
菊園中有小茅屋朴坦齋借寓余常常造三人繞花
坐摘英泛酒鬪硬韻聯賦相笑爲樂今見西風吹菊
花輒不禁西園之想國輔之友惟數人在而亦皤皤
老矣相語曰以國輔之學與識不流芳於巖廊館閣
之間而欲以州縣之政鄉黨之行表章吾國輔則豈

曰吾國輔也哉銘曰

維奕今而焜後兮摠名之曰名也彼乘軒而來金紫者名耶此被禍而懷瑰珍者名耶吁嗟乎國輔稟何其清明操何其剛潔識何其練精盍觀夫屈伸亨屯之理蘊不施者名益羸名惡乎名名其名者惟經山之銘也

族人戶曹叅判

彥儒

墓碣銘

我鄭出自東萊源長根厚其派條之爲支爲傍者亦皆自立門戶詒厥孫子有德善勲烈節義聲名著於國而顯其美粵在 英廟朝有若臣彥儒又其一也

公字林宗號迂軒

成廟朝名臣吏曹判書翼惠公

諱蘭宗有子諱光輔昌原府使光弼領議政文翼公昌原公七世孫諱有徵贈司僕正生諱匡周翊贊贈承旨公曾祖祖也考諱雲瑞叅奉贈吏曹叅判用公貴也妣贈貞夫人全州李氏佐郎鼎興女繼妣贈貞夫人坡平尹氏通德郎恒女公生 肅廟丁卯十月景宗辛丑文科隸槐院 英宗丙午陞禮曹佐郎有要路者請交結曰功名可期公面斥之居數日黜爲北關亞使不赴丁未海伯逝公由騎郎差亞使權行刺史事者且三朔還重拜騎郎以輪對官侍 上前

條對該暢 上器之未幾特除泰川縣公之受知於
上始此莅官廉明大有治理及解吏民擊鼓願借將
行臥轍不得進乘夜疾涉江不及者望而號哭道伯
宋寅明啓請留不獲辛亥守溫陽郡庚戌之大熟餘
也公審穰旱之理及夏請巡使賤買麥預備巡使然
其言散錢列邑廣儲麥秋農敗而一省賴活公實有
力焉或勸營產業公謝之曰飢歲仰俯事育主恩洪
矣敢利之乎捐廩補賑溫民獨不灾道狀繡單互褒
之法應加級選部以徑陞難之代以準職乙卯拜晉
州牧好客閤不阻客至如歸道伯閔應洙書考侵之

公辭還道伯折簡謝之曰豈毀哉後居銓屢稱之注
外窠輒擬戊午拜掌令弼善選知製教居臺閣必盡
言上陳勉十條疏 上嘉之時宗親請上尊號公論
以諂諛 上臨筵教曰今日始見臺臣風采屢以雷
肆官陪講陳旨義明暢易曉 世子稱善曰他人說
文義如隔一膜子弼善說文義習次豁然無礙滯誠
可喜公時帶弼善也公貧且儉衣弊緼袍不恥朝衣
只一染布製也無寒暑着之一日以諫官前席時值
大冬 上諭大臣諸宰曰予聞東宮言今始釋憂也
諸臣相顧驚喜齊對曰聖教謂何 上曰予嘗問東

宮汝於羣臣或見特異人乎 世子對曰臣果見可
貴之人予曰爲誰 世子曰鄭彥儒冬月常着布衣
是可貴予云冬月布衣之人誠可貴 東宮知衣布
之可貴尤可貴也自此付託得人豈不釋夙昔憂乎
今見彼臺臣果布衣矣仍思 東宮語及之諸臣拜
曰聖教及此宗社之福也聞者皆榮之辛酉拜順天
府使四朔而遭外艱吏民哭送者相屬癸亥判鏡城
官辭之甲子拜納言丁卯爲司諫時嶺伯言寧海弊
甚吏宜擇良者銓官乃舉公公上官陳疏請蠲減漁
船鹽盆之廢者及陳土起墾之稅又請蕩糴穀虧欠

者六千斛並賜採施邑民大悅又於騰雲山下築堤
儲水灌田數千頃稱爲鄭公堤庚午薦授濟州牧使
島荒方賑公至民不飢乃設黑牛牧場又置橘柚三
園民便之辛未還乙亥拜同副承旨曩公居臺地時
上稱某人宜大用公不然之後果如公言至是 上
謂筵臣曰此承宣有先見之明又謂公曰前在濟州
論懿親事予不能無介於心屢年不與官今思之實
有憂國之忠真可用者也自是眷注益隆凡外方俗
習朝著得失多所諮詢丙子特陞嘉善階卽授同中
樞同義禁刑曹叅判副摠管戶曹叅判華誥聯翩特

除居多公愈老愈自厲草屋不蔽風雨盛冬藉藁薦日中一蔬糲處之怡如公有詩曰生計蕭條祇可憐暮年還作日中禪因筵臣言 上加稱歎後謂公曰聞卿常宿不火之堦可異也特令永付同樞食其祿曠數也甲申三月考終享年七十八訃聞倅官致祭吊賻禮也葬鐵原道樂里先塋局內甲坐原後夫人祔焉原配廣州安氏通德郎瑞恒女判書獻徵曾孫女後配晉州柳氏進士甲昌女判書澗玄孫女并贈貞夫人有一男二女男灝早卒取公弟之孫益東爲嗣女叅判吳大益次李在寬孫曾不悉錄公肩秀神

清性簡亢不苟合立朝內無葭莩之親外無蟠木之援視勢若浼信已直行懿親有罪則論之宗英請號則論之極諫切諍不挫不懼受知聖明有疑必諮典州郡多著異績制強猾撫寡匱水操澄然一毫不累不以宦澤拓一畝布袍藁薦至動天語外和內明臨事計利害如布籌然篤孝親居憂廬墓恤寡妹成其家皆人所難行而在公則常也幼時受學王考文思日進一覽書輒記誦在湖邑叅試式科過拱北樓逢下科者數人問券製隨言續誦之諸生驚叫不敢稱屈有遺集若干卷以公直節廉規粹學剴識大布施

於當世則其寃卓炫焜之業豈不耀縑簡而刻彝鍾
爲今古所夸彰者哉豐晉之分不能無疑於賦與命
之際矣然而草野懷寶之士得人主一言尙可爲終
身榮况清儉忠直之褒雖宏碩崇顯之列何可易得
哉可謂閱永世而有餘光矣銘曰

蔚乎文而未施于五色其可謂得遇耶荷殊知而褒
踰於華袞其可謂不遇耶遇不遇時也施不施命也
聰明富有才也正直不阿性也篤倫盡忱行也約已
裕物政也紹其美於忠貞之裔庶史傳之列氏姓

贈直提學朴公箴墓碣銘

正宗大王崇獎節義尤曠感於壬辰兵燹時立殯諸
臣或賜爵諡或脩祭院祠壬子承宣林濟遠白于
上曰臣過洪州地路傍有旌門立荒烟野草中臣式
而讀之故忠臣學士朴箴遺墟也綽楔爲風雨所傾
頽行者咨歎宜付道臣修葺上曰故忠臣旌贈之
典文獻莫徵向令筵臣博搜以奏今爾言之當詢道
臣後孫令該曹訪問後上聞其雲仍無存外裔姓
李者權祀教曰忠臣之後法當繼姓諭支派中門長
使置其後於是諸宗集議以公弟左通禮諱等七世
孫進士孝永聞於朝上依允時論者或以統序間

屢代難之尙禮者曰於古有之漢石渠議父出後而子繼本宗之祖晉荀太尉顓何尚書琦無子援石渠議以族孫爲後此皆以司祭爲重而不以間代爲拘也噫大聖人愍恤嗣絕之盛德合古典而垂後法曷不盛哉 上曰雖非功臣忠亦不祧此忠臣蓋傑特者也承宣有是言實不偶然又聞尚州辦忠之地州人士設壇以俎豆之云用愍忠壇故事賜壇號曰忠臣義士壇親撰祭文以致侑令長吏春秋祭斗酒盃飯恩禮曠絕表闡崇報之典備矣公字大建始新羅景明王子諱彥忱胙封密陽子孫仍籍焉判典校寺

事諱原寶文閣大提學諱允文進賢閣大提學諱大陽在麗朝奕世爲名碩曾祖諱德老別提贈承旨祖諱栗司憲府掌令知製教贈吏曹判書大提學考諱天敘以孝薦補翊衛司左翊衛妣江陵金氏別提興義女公以隆慶丁卯生秀而藝文思瞻敏甲申魁庭試文科命官朴思菴淳愛年少拈韻以試才公隨呼輒對觀者驚噪稱異入瀛選拜弘文館校理戊子奉使監賑于耽羅壬辰島夷大舉入寇自善山薄尙州時巡邊使李鎰踰嶺辟公爲從事官與校理尹暹同會幕府畫贊戎務鎰駐兵甌淵見賊勢強梁畏恟不

敢前顧諸從事曰賊鋒不可逞盍少藏觀機公奮然曰國安危所判也進不能前退不能守惟全軀是圖乎人臣所在致其命吾輩自有死所鎡不應公知事不濟泣血密封疏曰尚州賊勢猖獗而主將恐懦不用策臣惟有一死報國又裂衣衫嚼指血書訣其父曰君臣義重父子恩輕時騎曹郎李公慶流以防禦從事亦會是日曉大霧迷漫不辨視砲聲至始知賊兵到竹峴鎡遁山谷三從事糾率餘衆冒矢石抗戰並相蹂躪鎡遁山谷三從事糾率餘衆冒矢石抗戰並死公死時謂咸陽人印彥龍曰吾十八登狀元及第

受國厚恩今戰不利何面目見吾君實四月二十五日也時年二十六公季父忠簡公急馳至求遺骸不得夜夢公告之曰吾尸不可得明日設祭置明水一器則有驗如其言有一髮飄下豎諸水面遂持葬于衿川番堂之原 上命旌閭贈直提學載續三綱行實配淑人安東金氏判書晬女無嗣一女適武副摠管李灝灝之子孫因奉祀至是始立孫焉孝永取伯氏承旨公次子殷會爲後有四子承奎縣監次承耆承老承喬嗚呼使公計而行者成敗固非可睹而豈止不交刃自潰也哉帷帳決筴智也矢石奮前勇也

古善戰者之疾風徐林由此道而惜乎公之不能獨
專節制也然尺身抗萬甲不懾死以壯國其正氣卓
節足以張官軍而破賊膽風聲所激亦不愈於一時
登陣舉旗之勲哉閭表壇號炳若丹青而易名之與
尹文烈未同舉者特未遑也竊俟夫世之尙名義之
論銘曰

天賦人兮與智勇或策勲兮或殉節同衛祔兮同耀
帛死或重於山兮風聲烈公籌策兮帥聽邈叫雲閭
兮沸腔血鼓不鳴兮旗偃黃霧兮蔽白日鏘礮兮霰
集鋌槊兮電掣巨虹霓兮森星宿忠胄義櫓兮氣孰
遏靈上征兮掃漲氛騰赤虬兮蛻一髮廓窮宙兮震
英名嶽峙帆兮江盪瀟桂醕蘭肴兮墀之夕風輪雲
旗兮神恍惚宸衷曠感兮立之孫梓栢蒼鬱兮百代
迄

戶曹叅判山雲李公

亮淵

墓碣銘

士之爲學也志乎本而不通則迂然有泥古之病事
乎末而不返則昧然有循俗之弊是二者均之爲過
惟臨淵李公探儒本而達士經慎思明辨博極羣書
秩秩而有序燁燁而有光懷宰物需世之具而竟窮
而老而沒而終焉朝之賢士大夫四方遊學之徒喪

其朋而失其師且惜之曰斯人也而如斯而已也哉
非斯人忘世之果也其宰相之過也歟其爲學也不
騫竒僻不躡高遠範驅於康莊之衢進步於百尺之
竿誠敬以爲根基仁義以爲被服立心專而確用力
密而篤其於理氣先後陰陽往來四端七情之說潛
思研究毫分縷析多自悟自得之妙嘗曰終日以思
不如學學是吾終身事也以心經近思錄爲師而以
栗谷書爲準則上而極於考亭書曰大聖後集大成
也專工誦法又汎覽諸子百家之文以領其要旁及
歷代典章文物星曆術數田制軍政默識而周通有
國之所以興替升降人物之所以臧否得失皆究其
故而該其實常曰天生一箇人便須管天下事學問
之道豈曲躬揖讓而止哉致知於萬事萬物然後方
可盡吾所受之分士若不法紫陽而好秘典希籍則
是異端也近世洋學之害由正學不明也遂著說痛
斥之尤精選於古禮常歎冠昏俗禮之失古廣采彙
摭述書行之公峻邁有奇氣少習帖括業爲親屈也
制闕絕意進取家益剝落不顧也時宰要赴舉笑謝
之盤湖尹公光顏歎曰求其志者也豈干祿乎哉好
飲酒好高吟歌詩好遊名山水蓋類遊方之外者卓

犖不可羈族人瞿圃公明淵與之語驚曰人傑也嘗擬於傅奕青山白雲人鄉鄰以山雲號之一日抽栗谷書讀之恍然曰吾道在是誦透得名利關方是少歇處之語乃曰延平以草衣木食爲工夫之要遂不堪突不覆衾飢則屑松葉啜之種杞菊韭螯助味人所不堪而甘樂之爵祿不入心晨興披方冊寓心繹口誦手抄體驗踐履交致其心雖疾病行旅不撤也耄耄而愈不倦有枕頭書石潭酌海嘉禮備要喪祭輯笏詩文若干卷扁所居曰臨淵取戰兢之義也與果齋成公近默海隱姜公必孝往復論難爲麗澤

之益及門者先授小學隨才誘迪各有成就爲文源六經而典雅簡古有韻者豪逸激烈如俠歌如隱操或如水石之紋枯桐之響篇出爭傳誦憂民澤物之思往往發於吟哦洪相公奭周見公蟹鷄詩除戶役湖西繡衣聞而亦蠲泰安之同此役者此可推小而見大也公自修之敦內行之篤事親奉先之節誨人愛物之誠徵辟不起之操一介不取之義皆人之難行者而在公卽庸言庸行也以公學術志槩臨大節當大事處大疑難則必有卓然樹立垂輝竹帛者而世以舍章未展慨恨之然操存本源闡發微奧衛正

關異嘉惠後學之功亦豈下於廊廟經濟之業哉公
諱亮淵字晉叔系出璿派以世宗莊獻王別子廣
平大君諡章毅公諱璵爲上祖生永順君恭惠公諱
溥五傳而有諱郁牛溪門人官郡守贈領議政屢傳
而有諱淳當肅宗己巳母后遜位謝世不出生
諱顯箕正郎生諱益中叅奉生諱義存正言贈吏曹
叅判公高曾祖考四世也妣慶州金氏同樞確女本
生曾祖諱顯慶縣監號畸窩祖諱和中考諱商雲號
泥軒有文行早世妣延日鄭氏諱錫斗女晉州姜氏
諱錫弘女姜氏以英宗辛卯九月二十四日生公

臨挽有山鳴之異幼儀殊凡兒八歲畫一圏圏中方
方中書人字像三才意也及長講明性理之學純
祖庚寅除繕工監監役甲午除厨院奉事皆不就乙
未差山陵監造官時山陵議未定大王大妃
命摠護使洪相顛周擇摠紳中通堪輿術者審視洪
相舉公名以奏貽書曰朱子論永阜陵休咎請求草
澤之士其意在蔡季通公曰君召其敢辭遂往而惟
辭祿洪相語人曰李某熟德鍊義非拘儒比真廊廟
才也除金吾郎又不出戊戌薦公學行拜忠清道都
事是外臺也庚子除軍資監正丙午議綏陵遷奉

憲宗召公又一膺擢授工曹叅議庚戌進嘉善階拜同知中樞府事法宜推恩三世而公以未嘗仕不請誥時元容以領相筵奏貶贈吏曹職待以儒賢也辛亥拜戶曹叅判同知敦寧府事兼副摠管及病遺戒薄葬葬以士令 上癸丑二月二十四日考終享年八十三葬利川爵弁里丁坐原配豐壤趙氏廷憲女松谷文簡公復陽五世孫端貞有閨範生于 英宗辛卯三月二十七日卒于 憲宗乙未五月十五日享年六十五贈貞夫人初葬廣州池谷至是合祔三男一女寅昱寅翊寅章進士女宋持善長房男度夏

女趙秉恂三房男勳夏繼次房衡夏元容王考贊成公與公先考叅判公以儒術相友善今於表阡之文念世好不敢辭銘曰

吁嗟乎公其可謂窮也歟秩銀青金紫之尊顯者吾未見其爲窮也吁嗟乎公其可謂達也歟無銘鼎紀旂之功業者吾未見其爲達也然而崇正學而擴奧撤蔽吾知其在本道則不爲窮也經其戶枯木古石之與處觀其人英華著而清明在躬其所謂匪祿而康匪爵而榮者耶又所謂政行於家德充於容者耶倡逸句而瀉曾中之礪礪犖犖乎振烈飈而噓長虹

元亮之節而希文之志松桂之標而冰蘖之風雲臥
青山明月來去者非公自誌耶冠章甫者其式爵弁
之宮

吏曹判書李公

嘉愚

墓碣銘

哲宗三年壬子六月二十四日大冢宰李公考終于
正寢壽七十計聞 上驚怛不視朝庀賜以禮越三
朔八月完襄于南陽北面道坡壬坐之原配貞敬夫
人坡平尹氏玄堂之右也公諱嘉愚字允賓延安人
其先唐中郎將茂從蘓定方平百濟留仕新羅封延
安伯子孫因籍焉入本朝有諱石亨判中樞府事錄

佐理功臣延城府院君號樛軒贈諡文康四傳而有
諱廷龜號月沙諡文忠左議政海內誦其文子諱明
漢號白洲諡文靖吏曹判書兩世典文衡子萬相進
士贈吏曹判書號琴谷子諱鳳朝蔭郡守贈左贊成
號蓮巖子諱正臣叅判贈領議政號櫟翁是公之高
祖也曾祖諱喆輔禮曹判書致仕奉朝賀贈領議政
號止庵祖諱學源蔭江界府使贈吏曹判書考諱田
秀蔭郡守贈左贊成兩世貤贈由公貴也妣達城徐
氏牧使命敏女繼妣江陵金氏學生尙游女繼妣廣
州安氏學生景奎女俱贈貞敬夫人公徐夫人出也

以 正宗癸卯六月二十四日生未晬而遭先妣喪
從叔父領議政忠正公諱時秀收育之 純祖丙子
擢庭試文科丁丑拜檢閱兼說書直翰苑日聞忠正
公有疾疏陳襁褓喪母鞠育於堂叔父母及長父母
事之向遭叔母之喪遵國制服齊衰朞申心制三年
今病報至請徑出救護批許之戊寅陞六品拜文兼
文學己卯別兼春秋正言持平出爲金城縣令辛巳
遭忠正公喪特除副修撰公持服不出右議政林公
漢浩筵奏李某三歲受養於從叔故相臣名雖叔姪
情則父子前居叔母喪心制三年今不宜異同請勿

擬官啣 上允之自是呼不及門者三載癸未服闋
拜校理修撰獻納差備邊郎問事郎廳乙酉拜西學
教授副應教特除兼弼善丙戌拜應教圈拜 奎章
閣直閣兼校書館校理又拜司諫執義軍資正丁亥
特陞同副承旨至知申事連拜禮曹叅議輔德戊子
爲春川府使己丑爲大司諫壬辰拜刑曹叅議因事
譴削旋敘拜兼輔德除成川府使甲午入爲吏曹叅
議乙未陞嘉善以 孝和殿執禮也同知敦寧府義
禁府及經筵副摠管兵曹叅判左尹丙申差同春秋
承文院提調陞嘉義階 純祖 翼宗御製校正勞

也拜副提學大司成以純元王后冊寶親上時對
舉承旨晉秩資憲付知中樞兼都承旨除工曹判書
知經筵都摠管差備局堂上己亥拜知義禁知春秋
判尹冬至正使藥院提調刑曹判書因叅議時事不
膺乍罷冬有使行庚子至自燕京拜知敦寧辛丑大
司憲壬寅留守廣州府甲辰箇滿兼奉常寺提調乙
巳同知成均館丙午主講經覆試陞正憲階綏陵
遷奉時敦匠也除禮曹判書兼繕工監提調丁未薦
授咸鏡監司以本道監試科場之儒生撓鬧事因臺
疏削職敘拜工判己酉六月憲宗昇遐差國葬都

監及行狀纂輯堂上陞崇政階兼觀象監提調知實
錄事哲宗庚戌拜右叅贊移兵曹判書校正憲
宗御製加崇祿資判義禁府事海西守令之被繡論
者議照差輕慈聖特教刊削敘拜藝文館提學
宗廟署掌苑署提調辛亥又拜兵曹判書尋移吏曹
判書行京察申臺佐模挾憾論劾公坦然居閒誥旨
連降一不出膺壬子入耆社此公之科宦踐歷也配
坡平尹氏知事光顏女甲辰甲午生卒之年也夙承
法家懿訓閨度咸備無育收叔弟鼎愚子長翼子之
郡守子純宰真宰女適趙冕夏庶子秉宰公稟賦溫

秀儀容端和守志恬約修身謹厚一見可知爲世家
賢裔也自幼熏染於及健履翁之哲行美範所覲者
惟鉛槧編校之業也所服者惟淵冰戰兢之誠也鐘
鼎之門而操不改於簞瓢金紫之階而處與同於韋
布若非存中而所秉者不移不動則豈能有是哉此
公之保其名全而歸之者也公篤行以不識親顏爲
至恨值夫日號慟如擗踊歲週疏請暇省阡摧傷不
自持居忠正公內外喪哀泣戚容隣里稱之友于兄
弟睦于宗族與人交悃悞相將無一毫虛僞假飾藹
然澹然而已罕出門不以勢利嬰其心雖三黜而三

遷喜愠不形於色處秘近進思盡忠講幄賓席隨事
規勉懇懇披忱聽者咸感歎出外而臨民爲政廉以
飭躬簡以御下愛浮於威捐先於斂去後民常懷之
才雋藝逸恒居一念不驚外玩好不留於視曼聲不
住於聽以縹緗卷帙爲課多識前往爲文不以沾沾
自喜不以規規爲治字順而理到句從而意暢爲詩
不致雕鏤惟平淡適情而已臨事不爲委曲求容信
心直行故或招官評或遭郵罰然旋皆洞白稱譽隨
之此尤見公不脂不韋之性卓乎難及也余於公生
同年宦同時勝冠交遊迄至白首每相對披露襟裾

不設畦畛常歎公之屏禁艷超翬塵而清雅之貌淳
真之姿承家之行向國之誠寔有古士大夫風今公
遽古矣其果古人之同歸乎竊爲今人道之銘曰
維延有閎彬郁乎文潤猷演綸炳苑淵雲公又鳳毛
鳴珮詞苑熏襲書香芝圃蘭畹左右縹緗上窺下逮
載啜載擷發爲藻采匪直文華令望令儀入贊廟筭
出臨藩司謙以自牧約以鮮失不銜不售恂恂是實
典選必公主試必精律躬玉潔理郡水清穹階華貫
用匪不究西樓圖帖亦云遐壽聖眷所注朝望所屬
胡不耆造施厥多畜敘公平素如傳古人瞻彼道坡

山岷水鄰

義州府尹李公

勉求

墓碣銘

璿潢之系德泉君後以文行著代有若白軒陶雲冠
陽連世掌太史締繪王猷冠冕藝林世所宗仰衆氏
族罕與倫匹冠陽尤工駢儷體裁高古其孫南霞公
力學繩武擢第士相語曰詞壇將有主矣竟止長國
子咸惜之公諱勉求字子餘南霞其號也德泉君諱
厚生諡積德 定宗大王第十子也德泉子新宗君
諱孝伯諡恭簡歷五世有諱景奭領議政典文衡諡
文忠號白軒歷事 仁 孝 顯三朝德業載史乘

又三世而有諱真望大宗伯典文衡號陶雲生諱匡
德小宗伯典文衡號冠陽公曾祖及祖也考諱國亨
郡守贈吏曹叅判妣安東金氏大司諫濉女繼妣東
萊鄭氏錫鵬女并贈貞夫人以公貴也公鄭出也以
英宗丁丑三月生姿質重厚器宇宏遠自少好學不
惰及長試功令體舉泮試諸生莫或先捷劃額 正
宗戊午上庠庚申春 純祖春邸選坊僚拜翊衛司
洗馬旋移 永陵叅奉 純祖辛酉遷司甕奉事換
禁府都事冰庫別檢壬戌秋差嘉禮都監監造官陞
拜司憲府監察癸亥文科歷典籍拜司諫院正言文

兼宣傳官 正宗實錄廳郎廳甲子拜弘文館副校
理乙丑按廉海西獎褒刺舉不存吐茹剔隱補漏多
所矯釐海民頌之丙寅以館職叅圈坐議歧并投畀
公投安山旋還丁卯拜副應教戊辰歷執義司諫軍
資正出爲安州牧安劇州也簡以制煩重以鎮囂吏
憚嚴而民懷惠州例民之臥其糴者進錢於官公還
之曰法於何有無寧償汝逋也庚午以應教召還辛
未充通信副使與上使金公履喬涉海入馬島律已
清疑島人皆敬之還陞拜工曹叅議壬申除安東府
使公待士以禮撫民以仁蠲歛振匱謠頌溢境嘗自

京還入境適小雨過場市市民競脫襦舖地日忍使
我侯踏泥行乎甲戌拜承政院同副承旨自是連拜
薦授義州府尹翌年春遞歸邊門開而商稅錢入官
者累千公却之新尹欲輸致貽書勸受公謝曰留防
民弊又薦授東萊府使公以曾經信使辭遞拜侍講
院輔德除楊州牧使丁丑公以將緬襄朴夫人於境
內引法棄之拜成均館大司成戊寅十一月八日考
終壽六十有二葬楊州廣崇里良坐原與夫人同墳
配高靈朴氏府使仁榮女判書文孝公長遠五世孫
勤儉淑哲事舅姑孝相夫子敬舉二男一女長駿遠
早卒子象敬校理亦早卒繼子建相次龜遠前郡守
女徐承淳今都正龜遠子象慎今黃州牧使次象恂
今 禧陵直長女洪善周前縣監次洪在正象慎子
建相出後次建杓女朴龍彬林健洙朴齊教注書徐
承淳子相熙洪善周子祐弼祐翊女幼洪任正子舜
鍾次及二女幼公爲人寬厚恬靜待人祛表襮確然
有自守不隨俗桔槔篤孝親事伯氏愛敬對子姪以
法先褫躬爲訓鄉居貧甚蔬糲不繼怡然不致意以
尋數著述寓樂立朝修整屏援推絕意馳騫信心以
行理州府善績不易數而要之字單赤達幽枉操潔

如水常廩外一毫不近所過民到今稱之爲詩文主
從順平遠暢達而已自少熟書經成誦又手膽魯論
常讀至老不廢書法得白陶兩祖筆體古雅可貴與
先大夫敦契常同硯做四六余纔勝冠傍請教口授
範式後數日見課稿笑曰可教也今余處廊廟及耄
耄閱世多矣每歎日以公之厚德選學清規宏識若
早顯而究庸之則豈不爲邦國光乎銘曰
恂恂粥粥貌也坦坦泊泊志也爵祿不入於心所在
惟適其義處則法家拂士出則清慎君子芝有本醴
有源維其有是以似古與稽後爲楷其如公之謂矣

贈吏曹叅判李公

啓禎墓碣銘

振威縣馬山坊枕壬之原罽如而封者曰贈吏曹叅
判李公啓禎之玄堂也以 正廟丁巳十月十一日
生 純祖戊寅十二月六日終距其生爲二十二年
已卯正月葬于此後四十二年而貞夫人楊州趙氏
從而右祔六年而男吏部侍郎裕膺泣謂余曰吾鮮
民也至恨終吾身矣吾二歲而孤累世之門弱線如
也吾母以鞠以誨及于成人嘗告之曰吾事夫子日
短德美行誼莫能之詳熟聞舅姑昆弟之言者鏤于
心不忘也天植純篤事親左右就養惟親志是悅雖

勞不自覺也居喪戚踰於易祭日號擗如喪初吾以是知夫子之孝於親也處同氣因心湛翕遇甘煖必先於躬吾以是知夫子之友於兄弟也自少儀度偉雋器量沈重修身靜而謹慮事辨而遠長老常稱之曰紹先啓後更昌吾門者也吾以是知夫子之受愛於父兄也勤學好文才思日進泮試居前列式圍占解額詞賦多傳誦爲士者願交吾以是知夫子之推重於儕流也又聞閨話幼時與羣兒遊戲有攘隣鷄而勸分嘗者却之曰義乎事雖細廉介之由其性也及遭夫子喪吾決意下從斷糜粥飲水臥積雪中幾

絕家人救而甦然吾何恃而爲生哉以汝之一二有可待也吾聞有美質者不于躬則必于後此吾所以苟活也汝識之吾母自婦吾門尊嫜曰是愛我宗族曰是睦我婢媵曰是惠我居貧乏自力以衣食義方之教遇物之訓牖迷如慈父課程如嚴師常誡曰士子非學問何以立乎汝母之以存者惟汝汝父之以託者亦惟汝不學吾不如無知矣晝夜使讀書有客書聲止則婢傳語曰寡婦子何取而友之乎百談不如一讀客輒起去或出門令僕跟其門若文行佳士則喜之否則輒立召居平不敢怠至 憲廟壬寅講

詩經擢第秩金紫而三綰符節雕輿致養父母皆贈
顯誥矣吾之有今日皆吾母恩德也雖列之古傳中
烈女賢母無過也今述母言敢以狀謁謀所以顯表
阡道余悲其志敬其行而按其狀公字吉叟系出鷄
林鼻祖沙梁部大人謁平羅祖佐命功臣入本朝諱
夢亮右叅贊始林府院君諡定獻生諱恒福領議政
鰲城府院君諡文忠世稱白沙先生子諱井男禮賓
寺正子諱時術吏曹叅判子諱世弼有道學叅判諡
文敬世稱龜川先生子諱鼎佐副正號醒齋子諱宗
喆郡守公之曾祖也祖諱敬養叅判考諱容奎府使

妣溫陽鄭氏牧使致愚女出爲仲父縣監贈吏曹叅
議諱永翼後妣豐山洪氏大提學良浩女也公之配
趙夫人牧使濟晚女吏判雲遠曾孫也以 正廟丁
巳十二月二十四日生以 哲宗庚申閏三月八日
卒壽六十四子裕膺今叅判請銘者也貳選部贊廟
筭方爲時用孫男方中而秀美孫女并幼公生忠貞
詩禮之閔稟粹良偉俊之姿若假之年而博學而通
識用之朝廷則德行文章事功之炳照竹帛者豈可
量哉闕於命而一無所著見於世者士之識與不識
咸與嗟咨曰其於命何哉雖然後祿蕃衍之盛由公

以啓之則神之所以報佑者其亦理之不可舛歟銘
曰
豫章之未及材而捐於山瑚璉之未及器而淪於淵
之二物尙爲志士之恨况英才之艱厥生而不其少
延觀公後之駟容門而笏盈床談理者必曰不其然
乎必其然

鄭錄妻李孺人墓碣銘

惟國朝敦尙名教州閭閭婦人女子往往有竄截卓
異之行非學而後能之也其天植然也今鄭氏婦李
孺人之行之節超倫類躋彝常求之古傳所載無愧

也孺人籍全州孝寧大君裔也學生師膺孫也慶弘
女也以甲午月日生年二十一歸于東萊鄭錄鄭名
闕也自幼有至性淑行及嫁事舅孝事夫子敬動合
規度爲宗族隣里所歎服辛未夏夫邁厲齋沐禱身
代者日三四及知不可救取夫腰帶自經而逝家人
覺而解之已無及矣時四月十日也夫已絕而忽欠
伸家人驚恠止哭聲諦審之頃乃甦語曰夢至一府
方困見細君髮散而跣乞代夫命官垂惻遂釋之今
獲還矣親屬驚遑且幸且悲哭孺人益失聲舅曰生
也奇死也慟孝婦亡何以生爲見者曰異哉聞者曰

其然乎識者曰誠忱所通神明所感有理之不可常者古可徵也多士陳於巡使以及儀曹曹啓于上曰湖南士人朴宗敷等駕前上言請旌李氏閭實蹟一如士人言合綽楔以標之爲世俗勸也於是州官相其役州人聚觀曰烈烈哉世固有死從者而未聞死於生而生於死也烈烈乎哉風閨閣而範簪裙者莫尚也歟卒年去生爲三十八年夫後五年卒二男曰光淳曰光洙光淳舍慟茹哀至誠闡先烈鄉黨稱其孝墓在某地某坐原旌門傍有木自生葉叢而寒不凋人曰貞木也其候木而別之歟詞人過者多詩

文詠歎者於戲婦人之節如是是宜有銘銘曰

女一也孰如烈丈夫難行也死同也孰與千百禩垂名也過斯丘者必式此其卓節之藏也歟

顯忠祠碑銘

昔唐河北之亂玄宗歎曰二十四郡曾無一人義士耶及顏真卿書至喜曰不識何狀乃能如是噫義士之難得自古不其然乎元容以北饑守會寧府府西有祠祠享八義士皆州人旣祗謁肅然而作曰河北二十郡之僅有一人而何一州八人之多也詢蹟於州人士以祠誌進且曰州人士謀刻石久乞爲文余

辭以非其人州人士曰公命吏宜勸人以義乃按誌
萬曆壬辰島夷逼王京 大駕西狩宰相金貴榮黃
廷彧等奉臨海順和兩王子避入北夷酋行長西清
正北北列郡瓦解無城守者先是羅州謫民鞠景仁
爲會寧吏素悍惡結其叔鏡城吏世必及明川奴未
守木男等爲賊效欵受僞署判刑轄兵權逐長吏自
稱爲府使戕軍官李涵等及府屬嫌怨者五六人使
其黨金世彥等夜縛王子宰臣送賊陣將迎賊入城
時賊據富寧人心崩洶變且不測州人吳允迪尹豈
崔彥英鄭餘慶吳遵禮李希白許灌俱好學修行慨
慷有氣節相與議曰豐沛其胥戎乎倫綱將墜將安
用七尺軀哉寧死不與叛賊俱生遂約獵于龜山山
谷中密定策仍托掃灑聖廟潛諭同志者會校宮衆
皆至豈曰非勇且智者難舉申世俊其人至曰正吾
扼腕者諾而去景仁聞疑之召允迪允迪曰急矣諸
君勿我以也亟爲其所欲爲者景仁脅允迪不屈欲
殺之其母力止而免已而世俊與諸人集館門上吹
角軍卒至曰吾以爲判刑令欲去世俊拔劍斬去者
衆莫敢動遂領圍景仁家呼曰釋允迪乃解允迪出
幾死諸人益憤激圍益急叱景仁降不聽射殺之又

斬其黨朴林等六人使灌函送于義兵大將鄭文孚
時鏡城士人李鵬壽等倡義推評事文孚爲將文孚
使人間道奏行朝 上嘉之世俊拜折衝允迪灌彥
英主簿崑餘慶奉事希白遵禮守門將 肅廟癸未
州人立祠學宮傍識首議地也享鄭公以八義士配
之丁亥因賑繡朴弼明筵白賜額顯忠鄭公前已贈
左贊成諡忠毅 英宗乙卯因巡使李箕鎮狀請世
俊贈兵曹叅議餘七人贈戶曹正郎嗚呼當時狡夷
攻西北尤力北路陷則西京莫可保矣賊勢焱疾棄
城奔竄者不可一二數內有螫蠱毒虺之逞外無蚍

蜚蟻子之援危亡且朝夕無一可恃者而彼八人者
皆布衣書生耳不受命於朝廷且乏乘賦什伍之可
資而徒以義氣相激勵張空拳冒白刃芟內蔓而沮
外猜使鏡城義旅得張其勢竟奏臨溟雙浦之捷所
樹立如此卓卓其受勲典而享俎豆不亦宜乎禮曰
抗大難則祀之者是也如八人者誠無愧義名一州
郡雖或有一二亦足以暴於國中况八人之多乎抑
我 列聖朝德教培養之力而亦北人士之剛勇尙
義其於親上死長之道講之有素而然歟八義士其
先皆簪纓望族國初北徙爲府人今鄉中之業儒武

而著才行者皆其後也銘曰
屹彼鰲岑有歸祠屋云誰之享八士攸宅北人有言
微公則狄功則在民義則維國昔壬板蕩猾夷嚙北
獠燹燿燿厥醜彌域狼胥凌分繫貴款賊孰拒其喉
俾訑而熄月星忽皚鬢宮淨肅青青子衿腔血沸激
隻手何仗非鉞非戟惟義之秉何向不剋殲叛拉銳
賊會遁魄振動風聲翻海摧嶽鏡旅迺奮九鎮咸復
士也何如謁謁卓卓曷酬膚功左右侑食 王曰汝
忠於顯祠額若仍若來爾祖是式爾民爾士義士維
則

墓表

高祖考進士府君墓表

我高祖考進士公翼憲公孫也翼憲公名德爲時宗
臣公德器類其祖咸以遠大期之十八進士二十六
而卒所遺惟一孤耳家弱線如也孤長而四男八孫
曾玄男女百餘人嗚呼德之不自食而種之者歟善
之不有躬而詒厥後者歟公之世短其言行事爲之
所著見者無幾雖有亦無傳焉其何從而知之哉嘗
聞之父祖矣有一二條可書也公幼鞠于第四兄嫂
李夫人李夫人之喪從韓文公服嫂鄭之禮葬公後

三十年子判書公議遷墓役方始長孫澈淳夢公名而告之曰吾居安爾告爾親無動覺而詢長老公儀形及斂時衣也亟告墓不遷初高祖妣趙孺人決意下從家人防之甚判書公稍長篤于孝孺人遂依而安判書公乳時抱置膝指鄰居老人壽而多子孫者曰願汝如是足矣不願汝貴顯以榮我也御家有法度教諸孫以底長成及見曾孫數人嘗具碑石之臺于公墓曰吾子孫必有顯者至是其玄孫左議政元容立石而書之曰此吾高祖考進士公高祖妣孺人趙氏合封之墓也府使允容述幽誌又誌先系先墓

納之壙前公諱任先字能叔生 肅宗壬戌十月十四日卒丁亥三月二十五日葬揚州妙積山下栗北里壬坐原配孺人系漢陽都事元卿女生壬戌二月十八日卒壬申八月二十三日我鄭東萊人 中宗時文翼公諱光弼領議政配享 廟庭五傳而翼憲公諱太和領議政配享 顯宗廟庭第三男諱載岳蔭知敦寧娶慶州金氏禮曹判書貞孝公南重女有六男公其季也有一男一女男錫曾贈吏曹判書女適清風金聖構判書公四男二女男澈淳啓淳大司諫世淳縣令有淳縣監女適僉正尹淑基柳鉉五金

聖構一男一女男天黜女壻李遠祚公之後曾玄以下男女不能盡載今只錄姓孫勝冠者竄淳子東臣東民東仁東臣子德容進士翼容前縣監德容子基元前監役基憲基稷今正字基厚翼容系子基厚基元子漢朝基憲子璫朝基稷子岐朝興朝東民子九容九容系子基麟東仁子喆容今主簿赫容喆容子基斗赫容子基鴻基鵬進士基鶴基麟基鴻子敬朝基鵬子徹朝啓淳子東晚都正東勉叅議東逸東晚子元容今判中樞憲容前牧使元容子基世今承旨基季今都事基命進士基世子範朝憲容子基會東

勉子始容今府使始容子基大今奉事世淳子東龜府使東龜子禹容進士夔容稷容禹容子基永有淳系子東逸司書庶子桓前叅軍東逸子允容今府使老容今判官允容子基陽基雨老容子基春基夏

曾祖考贈吏曹判書府君墓表

維我曾祖考府君卒于 英宗壬辰二月十一日葬于華城松洞面柳鶯谷甲坐原後八年庚子六月六日而曾祖母李夫人繼卒從祔公墓今七十有六年矣曾孫允容謂其從兄元容曰我曾祖有至行有厚德子孫衆且顯而墓道尙闕表誌吾父祖非敢緩也

蓋有待也今幸因兄相職朝廷貶贈大冢宰誥矣今
執役其在兄乎吾且述幽誌又誌先系先墓以藏之
壙前失今不圖恐無以示吾子孫遂相與謀刻石而
表之府君六歲而孤事太孺人孝五十年不離側役
使不以委婢僕供具極滋味榮顯非太孺人志也嘗
舉解元再赴會圍不利又遵知敦寧公戒仍廢舉業
幼鞠于第四叔父同敦寧公諱欽先恒父事之同敦
寧公無嗣悉以家畀之曰汝祀我及喪爲心喪三年
少邁熱疾幾危一日服寒劑十數椀乃瘳閉戶潛靜
終歲無過從好居鄉廬兒孫日侍側怡愉諸父諸姑

至老說幼少時吾祖父母老在堂吾諸父諸母各恭
其職滄隨皆親執無闕吾諸兒孫常滿前分餘甘以
爲樂也僕役之遠居者其出有科名去其券家人莫
之知也教子孫篤學皆以謹厚聞而稍稍多顯達者
府君諱錫曾字孝則生 肅宗壬午七月七日娶廣
州李氏都正成允女贈貞夫人生壬午九月二十九
日及歸事姑孝教子以義克相內治趙孺人嘗稱之
曰吾子婦御家類我我鄭出東萊領議政翼憲公諱
太和府君曾祖也祖諱載岳蔭知敦寧考諱任先生
員妣孺人漢陽趙氏都事元卿女府君四男二女男

取淳啓淳大司諫世淳縣令有淳縣監女適僉正尹
淑基柳鉉五取淳子東臣東民東仁女適尹成烈趙
誠存朴獻圭金魯鍾啓淳子東晚都正東勉叅議東
逸世淳子東龜府使有淳系子東逸司書女適今叅
判尹秉烈庶子桓前叅軍尹淑基子弘鎮縣監重鎮
柳鉉五子大洙魯洙進士府君之後曾玄以下男女
不能悉錄今只錄姓孫勝冠者東臣子德容進士翼
容前縣監德容子基元前監役基憲基穆今正字基
厚翼容系子基厚基元子漢朝基憲子璫朝基稷子
岐朝興朝東民子九容九容系子基麟東仁子喆容
今縣監赫容喆容子基斗赫容子基鴻基鵬進士基
鶴基麟基鴻子敬朝基鵬子徹朝東晚子元容今判
中樞憲容前牧使元容子基世今承旨基季今都事
基命進士基世子範朝憲容子基會東勉子始容今
府使始容子基大今奉事東龜子禹容進士夔容稷
容禹容子基永東逸子允容今府使老容今判官允
容子基陽基雨老容子基春基夏府君蘊德不施發
於其後有如此者宜子孫之知先祖之美而思繼夫
爲善之志矣勿怠哉

王考大司諫贈左贊成府君墓表

南漢之山東行十餘里挺然而起者爲客山山之下
已坐之原實我王考大諫公葬也葬之四十一年而
小子始撰次立石先考意也小子嘗聞諸子孫之私
相語者曰吾祖水竹公有厚德於子孫爲子孫者不
可不知又曰吾祖知敦寧公有厚德於子孫爲子孫
者不可不知又曰吾祖大諫公有厚德於子孫爲子
孫者不可不知蓋水竹公屢經艱難變故燭幾炳義
潛德葆光以庇賴我子孫知敦寧公履盈滿豐盛之
會謙恭抑損遠避榮名以庇賴我子孫大諫公承淹
屈之餘績學紹業含章留餘以庇賴我子孫此子孫

所以不可忘者也夫諸子孫之言豈敢私吾祖哉必
可信也夫吾鄭出東萊始祖諱文道生高麗左僕射
諱穆遂大顯入本朝有諱蘭宗右叅贊策佐理勲封
東萊君諱翼惠生諱光弼領議政相 中宗配享
廟庭諡文翼生諱福謙府使生諱惟吉左議政號林
塘生諱昌衍左議政號水竹生諱廣成判書號濟谷
生諱太和領議政相 仁祖 孝宗 顯宗配享
顯宗廟庭諡翼憲號陽坡生諱載岳知敦寧生諱任
先進士德器類翼憲公未及就而早卒生一子諱錫
曾贈司僕正既早孤奉知敦寧公教戒不赴舉居鄉

以潛晦娶敦寧府都正李公諱成允女生四子公其仲也公諱啓淳字沃汝以英宗己酉三月十九日生乙酉進士丙戌除獻陵叅奉陞中部奉事宣陵直長壬辰丁外憂廬墓三年服闋除童蒙教官移義禁府都事繕工奉事陞典牲直長正宗丁酉闡甲科以科前資窮陞通政尋拜豐川府使爲養也入拜敦寧府都正工曹叅議庚子居內憂吉拜兵曹禮曹叅議連拜承旨大司諫出爲青松及楚山己酉六月十二日捐館于楚山府壽六十一公性仁厚篤孝友睦宗黨厚物而廉已與人言辭氣藹然有感動人

者人樂其和粹簡易而中實耿介有不可移者幼時王母趙孺人偶警責公方出適風激戶掩公復啓而徐闔之王母大奇之及長約婚於柳夫人夫人家有故家人以待制闕難之公曰柳公在世議已定今違之不可遂待而娶少自勵爲文以親老屈意舉子業屢屈而名益盛每赴試士林傳誦其文及擢科獨閉戶自適時與士友歡飲談文史於世事泊如也顯達者或要其過從亦不顧也以是蹇於仕路未克有展布而莅官律躬遵法雖上司簿檄不當理則未嘗曲循嘗年荒穀貴上司以穀四千斛付公俾售時直而

資其剩公笑曰非吾志也乃減價與民民之受惠者
幾七十萬錢民以爲我土雖荒我穀不荒檢死獄治
書必屢閱不已曰此死生人者也隻字不敢不盡心
杖罪者值雨及凍輒布藁薦獲一盜盜頓首服冀自
新公曰爾悔前之爲乎慎勿再誤諭以力業自食之
方辭甚款盜感泣後遂爲良民所在不威而民畏其
清不言而民懷其仁公儉薄自奉貧窶不以累心誠
於奉先居官有餘貲不于家而必于宗姪雖一魚一
果亦未先自嘗教子姪各隨才授業而以謹守家規
爲先公德行學識旣大有蘊抱而斂跡榮塗樂處窮

約使其德累而善積嗇於躬而厚於其子孫者有如
此嗚呼爲公之子孫者將何以而報公之德萬一也
耶夫人文化柳氏縣監諱聖模女性柔和貞靜勤女
工手釵女則閨範藏箱篋者屢十卷事舅姑順志處
娣姒盡道訓諸子以義家匱乏甚而常自力以衣食
使夫子安而諸子就學焉小子尙記七八歲時遊夫
人側見夫人每手自縑絲不暫暇時與飯撫愛之課
小子書諸父自外至夫人以文辭道小子遊嬉狀小
子不識爲何語及諸父責小子皆如目見小子以爲
異雖諸父出外不敢廢書課今小子荷先訓榮祿忝

宰列而夫人不及見嗚呼痛哉夫人從封淑夫人戊申五月二十四日生壬子十一月十六日卒壽六十五附公墓左三男長東晚敦寧府都正贈吏曹叅判次東勉今府使次東逸司書爲季父後都正男元容今叅判憲容今奉事繼小宗後女適徐稷輔李龜遠庶女適金載大府使男始容今縣監司書男允容老容俱進士元容男基世基季次幼女適尹周鎮憲容女適李裕元次幼始容男基大允容男女幼老容三男幼徐稷輔男長淳李龜遠男象慎次幼女適洪善周次幼

先考敦寧府都正贈領議政府君墓表

嗚呼此我先大夫敦寧府都正贈議政府領議政鄭公先太夫人贈貞敬夫人龍仁李氏合葬之墓也葬此三十年而子元容與其弟憲容立石而表之先大夫諱東晚字友古自號拙庵生 英宗癸酉四月十二日卒 純宗壬午八月十一日壽七十先太夫人癸酉九月八日生甲申十月二十八日卒壽七十二先大夫初葬楊州馬山地是年十二月移襄于始興南面珠峰下甲坐原貞敬夫人以禮合祔我姓系東萊遠有代序有諱蘭宗吏曹判書東萊君謚翼惠生

諱光弼領議政諡文翼配享 中宗廟庭生諱福謙
府使生諱惟吉左議政生諱昌衍左議政生諱廣成
判書生諱太和領議政諡翼憲配享 顯宗廟庭翼
憲公五男第三曰諱載岳蔭知敦寧有六男季曰諱
任先進士有德器早世有一子曰諱錫曾贈吏曹判
書有四男仲曰諱啓淳大司諫贈左贊成文行爲士
友所重配贈貞敬夫人文化柳氏縣監聖模女溫惠
莊潔閨則咸備先大夫考妣也先大夫生時母夫人
夢麒麟繡珠鞍入庭生而穎悟好學長治舉子文尤
工再解泮試丙午進士甲子拜 敬陵叅奉丁卯移

義盈庫奉事尋移義禁府都事換繕工監奉事辟爲
廣興倉奉事陞直長主簿庚午拜永柔縣令癸酉陞
載寧郡守乙亥遷順興府使丁丑辟爲宣惠廳郎廳
戊寅除晉州牧使己卯又辟爲惠局郎壬午以子貴
推恩陞通政階拜僉知中樞府事移敦寧府都正後
屢贈吏曹叅判判書議政府左贊成領議政爲永柔
時土賊薄安州徵兵急先大夫時兼肅川官肅前營
也夜半戎服往招吏民諭以義辭激感人卒伍乃雲
集領入安州城城方一髮危賴以安監司鄭公晚錫
書考曰調兵最先治民可知賊據定州城列邑危疑

縣底一夕民家頭尾火縣校押一總角至衆欲以賊黨論竟以罪疑釋之衆心乃安振窮乏蠲徭役勞來撫字無一戶流者又捐俸置諸坊防斂載寧各庫債殖舊屢萬戶亡多橫徵矯革蕩其券一郡咸蘇荆司馬齋養武契劃財資課肆儒武大悅晉州裝漕稅羨錢三千緡曰官屬耳橐錢而去乎分與民所至一以恩信治之嘗歷歲不答一人按使李公晚秀考上曰如古循良不煩鞭撻居時輒有美稱去後民益思之性至孝母夫人病夢神告得對劑以痊觀王考楚山府丁憂楚人之見侍疾臨喪者稱爲鄭孝子曰謁廟

時節省墓展辭必哭遇忌日齋居衣布如免喪初疾革執小子手泣曰吾少也貧吾親甘旨常不足屢食於官而祿不逮此吾恨也嗚呼其慕也終身矣季司書公幼腫爲療救處冷埃經冬無難色厚嫻朋一推誠心生不識僞言飾行應物務以柔勝訓子弟必遵家規一衣食勿踰濫曰人各有福有分福宜儲分宜守小子請赴親舊燕會或止之曰無勞而食盛饌不懼乎謙畏謹質常形於體貌李太史晚秀徐太史榮輔語小子曰而翁其厚德君子歟而早顯豈無自乎臨終呼一賦敘述平生以遠勢利養精力擇交遊諄

諄遺戒婦女請見見去之曰禮不云乎姨弟李領相
相璜歸語其家人曰知鄭兄有所養今見之其有學
力人歟先大夫自少勤學誦經書諸子古文夜爲常
至老不撤爲詩文平淡暢達取適情自樂而已有集
藏于家以先大夫德器學識使少獲從事於世其功
名豈少哉不有躬而施子孫天之報施者遲速無不
同歟先太夫人禮曹判書孝簡公諱崇祐女十七歸
先大夫事舅姑順敬曾祖母李夫人老廢視食寢須
太夫人而後安志適忘其病嘉之曰汝孝且仁必有
後常呼爲千孫母旣饋自力以食治御有程度早賴

櫛晝趨事夜紉綴諸子衣油燈至曉熒然燈滅向月
治縣絮嘗曰食而怠事者不知畏天乎將就永柔衙
從祖山清公曰賢婦之治產業高於人一等耳自貧
而官無一婆索償債貸者耶可以風世閨閣也睦厚
族黨有窮喪每親自裁縫手爲之舐曰生也憐送宜
厚遇婢御有恩哭夫人柩前者無不失聲號絕姻家
母訓女必曰願汝每事效某夫人卽古淑女無過也
慈小子已甚綳裸至金貂撫保祈祝無一息或間至
誠所感獲佑神明年過七秩忝上和而吾母不見此
恨此慟其將與穹壤而無極矣二男二女元容領議

政入者社憲容蔭承旨繼小宗女適徐稷輔季李龜
遠前郡守庶女適金載大元容子基世今叅判基季
今郡守基命前教官女適尹周鎮今縣監憲容子基
會進士女適李裕元今承旨季洪輔燮進士稷輔子
長淳今縣監龜遠子象慎今縣令象恂進士女適洪
善周今直長季洪在正載大子弘錫武科僉知玄錫
武科基世子範朝進士女適季翊宰周鎮子滋福進
士滋惠今應教餘並幼系之以言曰曰我幼子童孫
冢婦季女惟我父母之至行厚德永世勿替是儆是
則曰我疇夫圃丁樵奚牧豎人孰無父母之愛勿踐

勿履萬世永固

仲父工曹叅議府君墓表

吾父兄弟三人伯吾先考蔭敦寧府都正墓在始興
周峰下甲坐原季文科侍講院司書墓在廣州白雲
峰下酉坐原藏于廣州茂東山壬坐原者寔我仲父
叅議公也東距廣州客山下王考大諫公墓爲三十
里我鄭系東萊自麗朝簪纓爲世族入我朝吏曹判
書東萊君諱蘭宗領議政文翼公諱光弼爲十一世
十世祖再傳而左議政諱惟吉左議政諱昌衍判書
諱廣成領議政翼憲公諱太和德行文章名節功業

俱載國史文翼翼憲兩公配享 中宗 顯宗廟庭
翼翼公第三子諱載岳知敦寧第六子諱任先進士
子諱錫曾贈吏曹判書第二子諱啓淳大司諫贈左
贊成公高曾祖禰也妣贈貞敬夫人文化柳氏縣監
聖模女公以 英宗壬午十二月二十二日生 憲
宗辛丑五月十四日卒壽八十配豐山洪氏縣監冕
浩女甲申十一月二十九日生庚子正月十五日卒
壽纔十七豐川任氏正言希一女甲申十一月一日
生己酉六月二十二日卒壽八十六俱贈貞夫人墓
祔公左右戊午生員狀元甲戌 永禧殿叅奉歷義

盈庫奉事西部都事翊衛司司禦宣惠廳郎廳軍資
監正內職也扶餘清道仁川外職也辛丑陞通政爲
敦寧府都正工曹叅議任夫人質厚而心和善居貧
躬爨而無難色食力而無求假使夫子安而妯娌悅
舅黨稱之育一男始容今叅判子基大前縣令女趙
晚和基大系子鎮朝女朴鳳彬嗚呼我王考厚德而
勤學諸子不外傳不遊學以父爲師與兄弟爲友家
素貧蔬糲不繼日相對怡怡談論惟經史每制作得
佳句相笑爲樂不羨慕勢利榮名公尤喜抄錄古書
窓暗或燃燭手無片頃閒瓶罌空而管楮未嘗乏彙

溢篋笈家人語曰子孫雖不買書籍覽此可貫穿古
今吾家自先世質儉廉勤恪職事飭內行樸服慤貌
恭謙自後不循名惟適義一見不問知爲鄭門子弟
世謂有嶺南風及世降而浸衰然見吾仲父者初見
皆曰鄭門人也官桂坊服御不入俗每僚會屏坐手
抄史記嘗陪東宮駕雨急騎不至涉濘步從諸僚
相顧敬歎蔭正之選以聞望也公瘦勁長幹性峭方
而慈諒襁褓時飲母夫人乳雖夜見母夫人不加髻
啼不飲及長耿介不羣一毫不苟取見人慎拙不先
語久而款曲一以誠間之諧笑愛及微物雖魚蟹見

生舍不食嘗畜鷄鷄生卵不抱終不破此其細而可
推其大也居郡縣持約而施厚見窶窮者若惻如傷
盡心以救濟之民愛悅之去久而愈思所過皆然公
之葬初在仁川吏民相其役如趨今日我侯葬也篤
孝友睦姻族受祿俸先宗姪而後自食遇先祭必佐
遵實屢世墳山具石儀與碑表平居澹嗜節攝大耋
尙康健緋衣行回香禮壽福爲世所稱今侍郎擢耆
老科縮金帶按彤節公之不于躬而裕于後者歟

經山集卷十六



